

五
代
史
記
注

五代史記卷第二十四

廬陵歐陽脩撰

徐無黨原注

南昌彭元瑞注

劉鳳誥排次

唐臣傳第十二

郭崇韜代州雁門人也爲河東敎練使爲人明敏能應
對以幹材見稱五代史郭崇韜字安時代州雁門人也
父宏正崇韜初爲李克修帳下親信克修鎮昭義崇韜累典事務以廉幹稱克修卒武皇用爲典謁奉使鳳翔稱旨署敎練使莊宗爲晉王孟知祥爲中門使崇韜爲副使中門之職參管機要先時吳珙張虔厚等皆以中門使相繼獲罪知祥懼求外任莊宗曰公欲避事當舉可代公者知祥乃薦崇韜

爲中門使甚見親信

五代史崇韜臨事機警應對可觀莊宗嗣位尤器重之天祐十四年

用爲中門副使與孟知祥李紹宏俱參機要俄而紹宏出典幽州畱事知祥懇辭要職先是中門使吳珙張虔

厚忠而獲罪知祥懼求爲外任妻璣華公主泣請于貞

簡太后莊宗謂知祥曰公欲避路當舉其代知祥因舉

崇韜乃署知祥爲太原軍在城都虞候自

是崇韜專典機務艱難戰伐靡所不從晉兵圍張文

禮于鎮州久不下而定州王都引契丹入寇契丹至新樂晉人皆恐欲解圍去莊宗未決崇韜曰契丹之來非救文禮爲王都以利誘之耳且晉新破梁軍宜乘已振之勢不可遽自退怯莊宗然之果敗契丹

五代史十八年從征張文

禮于鎮州契丹引軍至新樂王師大恐諸將咸請退還魏州莊宗猶豫未決崇韜曰安巴堅紙爲王都所誘本

利貨財非敦鄰好苟前鋒小衄遁走必矣況我新破汴寇威振北地乘此驅攘焉往不捷且事之濟否亦有天

命莊宗從之
王師果捷

莊宗卽位拜崇韜兵部尚書樞密使梁王

彥章擊破德勝唐軍東保楊劉彥章圍之莊宗登壘望見彥章爲重塹以絕唐軍意輕之笑曰我知其心矣其欲持久以弊我也卽引短兵出戰爲彥章伏兵所射大敗而歸莊宗問崇韜計安出是時唐已得鄆州矣崇韜因曰彥章圍我于此其志在取鄆州也臣願得兵數千據河下流築壘于必爭之地以應鄆州爲名彥章必來爭旣分其兵可以圖也然板築之功難卒就陛下一日以精兵挑戰使彥章兵不得東十日壘成矣莊宗以爲然乃遣崇韜與毛璋將數千人夜行所過驅掠居人毀屋

伐木渡河築壘于博州東晝夜督役六日壘成彥章果

引兵急攻之時方大暑彥章兵熱死及攻壘不克所失

大半還趨楊劉莊宗迎擊遂敗之

五代史明年李存審收鎮州遣崇韜閱其

府庫或以珍貨賂遺一無所取但市書籍而已莊宗卽位于鄆州崇韜加檢校太保守兵部尚書充樞密使是

時衛州陷于梁澶相之間寇鈔日至民流地削軍儲不

給羣情洶洶以爲霸業終不能就崇韜寢不安席俄而

王彥章陷德勝南城敵勢滋蔓汴人急攻楊劉城明宗

在鄆音驛斷絕莊宗登城四望計無所出崇韜啟曰設

凝阻絕津路苟王師不南鄆州安能保守臣請于博州

東岸立柵以固通津但慮汴人偵知徑來薄我請陛下

募敢死之士日以挑戰如三四日間賊軍未至則柵壘

成矣崇韜率毛璋等萬人夜趨博州視矛戟之端有光

崇韜曰吾聞火出兵刃破賊之兆也至博州渡河版築

晝夜不息崇韜于葭葦間據胡牀假寢覺袴中冷左右

視之乃蛇也其忘疲勵力也如是居三日梁軍果至城

壘低庳沙土散惡戰具不完汴將王彥章杜晏球率衆

攻擊軍不得休息崇韜身先督歛四面拒戰有急卽應城垂陷俄報莊宗領親軍次西岸梁軍聞之退走因解楊劉之圍

康延孝自梁奔唐先見崇韜崇韜延之臥內盡得梁虛實是時莊宗軍朝城段凝軍臨河唐自失德勝梁兵日掠澶相黎陽衛州而李繼韜以澤潞叛而入于梁契丹數犯幽涿又聞延孝言梁方召諸鎮兵欲大舉唐諸將皆憂惑以謂成敗未可知莊宗患之以問諸將諸將皆曰唐得鄆州隔河難守不若棄鄆與梁而西取衛州黎陽以河爲界與梁約罷兵毋相攻庶幾以爲後圖莊宗不悅退臥帳中召崇韜問計崇韜曰陛下興兵仗義將士疲戰爭生民苦轉餉者十餘年矣況今大號已

建自河以北人皆引首以望成功而思休息今得一鄆
州不能守而棄之雖欲指河爲界誰爲陛下守之且唐
未失德勝時四方商賈征輸畢集薪芻糧餉其積如山
自失南城保楊劉道路轉徙耗亡大半而魏博五州秋
稼不稔竭民而斂不支數月此豈按兵持久之時乎臣
自康延孝來盡得梁之虛實此真天亡之時也願陛下
分兵守魏固楊劉而自鄆長驅擣其巢穴不出半月天
下定矣莊宗大喜曰此大丈夫之事也因問司天司天
言歲不利用兵崇韜曰古者命將鑿凶門而出況成算
已決區區常談何足信也莊宗卽日下令軍中歸其家

屬于魏夜渡楊劉從鄆州入襲汴用八日而滅梁

史未

幾汴將康延孝來奔崇韜延于臥內訛其軍機延孝曰
汴人將四道齊舉以困我軍莊宗憂之召諸將謀進取
之策宣徽使李紹宏請棄鄆州與汴人盟以河爲界無
相侵寇莊宗不悅獨臥帳中召崇韜謂曰計將安出對
曰臣不知書不能徵比前古請以時事言之自陛下十
五年起義圓勦爲雪家讎國恥甲冑生蠻虜人困輓
輸今纂崇大號河朔士庶日望蕩平纔得汶陽尺寸之
地不能保守况盡中原乎將來歲賦不充物議咨怨
設若劃河爲界誰爲陛下守之臣自延孝言事已來晝
夜籌度料我兵力算賊事機不出今年雖雄必決聞汴
人決河自滑至鄆非舟楫不能濟又聞精兵盡在段凝
麾下王彥章曰寇鄆境彼旣以大軍臨我南鄙又憑恃
決河謂我不能南渡志在收復汶陽此汴人之謀也臣
謂段凝保據河壘苟欲持我臣但請畱兵守鄆保固楊
劉陞下親御六軍長驅倍道直指大梁汴城無兵望風
自潰若使僞主授首賊將自然倒戈半月之間天下必
定如不決此計傍採浮譚臣恐不能濟也今歲秋稼不
登軍糧纔支數月決則成敗未知不決則坐見不濟臣

聞作舍道邊三年不成帝王應運必有天命成敗天也
在陛下獨斷莊宗蹶然而興曰正合吾意丈夫得則爲
王失則爲虜行計決矣卽日下令軍中家口並還魏州
莊宗送劉皇后與興聖宮使繼岌至朝城西野亭泣別
日事勢危蹙今須一決事苟不濟無復相見乃畱李紹
宏及租庸使張憲守魏州大軍自楊劉濟河是歲擒王
彥章誅梁氏降段凝莊宗推功賜崇韜鐵券拜侍中成
德軍節度使五代會要後唐同光元年十月以侍中監修國史郭崇韜兼領成德軍節度鎮冀深
趙等州觀察處置等使真定尹依前樞密使莊宗與諸將以兵取天下
而崇韜未嘗居戰陣徒以謀議居佐命第一之功位兼
將相遂以天下爲已任遇事無所迴避而宦官伶人用
事特不便也五代史莊宗至汴州宰相豆盧革在魏州令崇韜行中書事俄拜侍中兼樞密使及郊禮畢以崇韜兼領鎮冀州節度使進封趙郡公邑二千戶賜鐵券恕十死崇韜旣位極人臣權傾內外謀猷

獻納必盡忠規士族朝倫頗亦收獎人物內外翕然稱之初崇韜與宦官馬紹宏俱

爲中門使而紹宏位在上及莊宗卽位二人當爲樞密

使而崇韜不欲紹宏在已上乃以張居翰爲樞密使紹

宏爲宣徽使紹宏失職怨望崇韜因置內勾使以紹宏

領之凡天下錢穀出入于租庸者皆經內勾旣而文簿

繁多州縣爲弊逮罷其事而紹宏尤側目五代史初崇韜與李紹宏

同爲內職及莊宗卽位崇韜以紹宏素在已上舊人難

制卽奏澤潞監軍張居翰同掌樞密以紹宏爲宣徽使

紹宏大失所望泣涕憤鬱崇韜乃置內勾使應三司財

賦皆令勾覆令紹宏領之冀塞其心紹宏快悵不已

五代會要後唐同光元年十一月以左監門衛將軍判

內侍省李紹宏兼內局紹宏在莊宗皇帝龍潛日爲中

門使及卽位命潞州監軍張居翰與郭崇韜爲樞密使

以紹宏爲宣徽使心常不足崇韜知之乃置內局之名

凡天下錢穀簿書悉委裁決崇韜頗懼語其故人子弟州縣供帳煩費議者非之

崇韜頗懼語其故人子弟

曰吾佐天子取天下今大功已就而羣小交興吾欲避

之歸守鎮陽庶幾免禍可乎故人子弟對曰俚語曰騎

虎者勢不得下今公權位已隆而下多怨嫉一失其勢

能自安乎崇韜曰奈何對曰今中宮未立而劉氏有寵

宜請立劉氏爲皇后而多建天下利害以便民者然後

退而乞身天子以公有大功而無過必不聽公去是外

有避權之名而內有中宮之助又爲天下所悅雖有讒

間其可動乎崇韜以爲然乃上書請立劉氏爲皇后

五代史

崇韜自以有大功河洛平定之後權位熏灼恐爲人所傾奪乃謂諸子曰吾佐主上大事了矣今爲羣邪排

毀吾欲避之歸鎮常山爲菟裘之計其子延說等曰大
人功名及此一失其勢便是神龍去水爲螻蟻所制尤
宜深察門人故吏又謂崇韜日侍中勲業第一雖羣宦
側目未必能離間宜于此時堅辭機務上必不聽是有
辭避之名塞其讒慝之口魏國夫人劉氏有寵中宮未
正宜贊成冊禮上心必悅內得劉氏之助羣闇其如余
何崇韜然之于是三上章堅辭樞密之位優
詔不從崇韜乃密奏請立魏國夫人爲皇后崇韜素廉
自從入洛始受四方賂遺故人子弟或以爲言崇韜曰
吾位兼將相祿賜巨萬豈少此耶今藩鎮諸侯多梁舊
將皆主上斬祛射鈎之人也今一切拒之豈無反側且
藏以佐賞給五代史初收汴洛稍通賂遺親友或規之
崇韜曰余備位將相祿賜巨萬但僞梁之
日賂遺成風今方面藩侯多梁之舊將皆吾君射鈎斬
祛之人也一旦草面化爲吾人堅拒其請得無懼乎藏

余私室無異公帑及郊禋崇韜悉獻家財以助賞給
清異錄一時之菓品類幾何惟假蜂蕪川糖白鹽藥物
煎釀曝粉各隨所宜郭崇韜家最善乎此知味者稱爲九天材料

莊宗已郊遂立劉氏

爲皇后崇韜累表白陳請依唐舊制還樞密使于內臣而并辭鎮陽優詔不允崇韜又曰臣從陛下軍朝城定計破梁陛下撫背而約曰事了與卿一鎮今天下一家後賢並進臣憲矣願乞身如約莊宗召崇韜謂曰朝城之約許卿一鎮不許卿去欲捨朕安之乎

冊府元龜後唐郭崇韜爲

樞密使中書令同光二年二月上表陳情曰臣聞底力辭封者貞臣之至節慢官速戾者有國之常刑其或任重才輕智小謀大縱君恩念舊未貽覆餗之譏倘官業無章何顯陟明之道臣本轅牙小校樗朽凡姿在公雖歷於年深臨事莫聞于日益頃者皇帝陛下雄圖方運陽德初潛爰將至于規繩乃俾司于機務此際臣亦內

循短淺累具退陳而陛下天眷不迴國權堅付在
而難違重命許五年而別選通人邇來雖昧經綸強施
勤拙至于戡夷巨孽徵紹鴻基雪三百年社稷深寃立
十九葉宗祊大事皆謀從聖慮斷在宸衷兼列較之同
心非微臣之獨計况今名昇台輔任處樞衡珥貂冕于
朝端統龍旌於閩外恩榮有進功德無稱終憂卽鹿之
嫌寧抑懸貆之刺今則陛下功全報本禮極配天衣冠
盡列於明廷名器宜推于碩德况臣才謨素寡齒髮漸
衰以有限之精神當無窮之事務必須下傾肝血上告
天聰冀勞逸之稍均庶初終之可保伏望陛下念臣不
逮察臣繇衷其樞密使比列親班實爲要執卽復本朝
規制宜選內官掌臨一則使權職有分一則免心力俱
耗輒茲傾瀝非敢闇欺于犯冕旒伏增隕越詔報曰卿
名高釣渭才大築巖夙符卦兆于周王早契夢魂於殷
主顧君臣之際會實社稷之威靈所以翊贊沖人續承
不祚頃歲以梁賊構逆唐室罹災羣兇競起于萑蒲九
廟皆生於禾黍忍恥而徒思嘗膽平居而未見沃心爾
能竭迺沉謀資子大計遂訓齊虎旅平殄梟巢文軌混
同梯航盡入延景運于綏旛之後建殊庸于誓帶之前
今況纔告額于郊壇方卜年于雉宅始欲與卿平章理

道講貫化源常遵馭朽之規每聽從繩之諫雖遷廊廟
尚委樞機從領藩垣不離都輦而又別頒金策求佐岳
圖今則忽覩表章遽辭繁摶進退徒聞子知足始終寧
稱于注懷是宜勵力扶持勉思翼戴旣叶雲從之義更
申日益之功將致君而須歷重權方爲主而難持謙柄
覽卿陳奏俾我焦勞宜體朕懷卽斷來表崇報又表曰
臣以機務實繁智力但困輒有間天之請願辭密地之
權豈謂聖旨俄宣皇情未允捧對而水湯滿腹端修而
芒刺盈軀臣以委質無材受恩踰等强展神扶之力每
懷曠敗之憂自陛下委寄重難纏綿歲序臨事而退思
補過竭力而知無不爲當陛下泓河料敵之時對寨交
鋒之日臣若顧將丹素堅有讓陳不惟招避事之譏抑
亦顯不忠之罪况今元凶已殄不構彌隆圓正陳報本
之儀寰海被無私之化英髦星萃拔邁雲臻絶惟不逮
之才豈掩旁求之命矧乃一身多疾三處持權捫心益
懼于滿盈持德每虞于忝據伏望陛下特迴睿照迺悉
煩襟終乞較此要樞歸於內列一則表大國有進賢之
道二則免微臣獨竊位之名于冒宸嚴無任迫切詔答
曰卿忠孝有稱古今無比竭智術而扶持景運蹈謙和
而統貫羣英鬱有勲庸刊於簡冊昨以翦平元惡開拓

不基權謀雖出於朕懷叶贊全資于爾力是乃委司鈞
軸任惣兵符樞機兼掌于金藏盟約備頒於鐵券實諧
德內外推仁可保于千載一時何輕於前思後慮况朕
綏寧寰海纔及半年告類圓丘未踰一月耆德便歸退
靜羣情莫測其緣方賴嘉謨永裨闢政卿宜勉持幹恪
永憊繁難更圖遠大之功共保初終之道其年八月崇
韜又上表曰臣伏念朝廷起軍之際陛下決于宸斷撫
臣背日此去必盪寇讐可期清泰事了之後與卿一鎮
臣仰奉成算固絕他疑果賴神謀尊平僞孽今乾坤交
泰弓矢載橐徽章已正于母儀嘉禮獲申於元子預傾
血懇仰瀆宸嚴但以密近之權合歸重望鈞衡之柄宜
屬通材至於所領節旄雖是陛下所許伏緣鎮州在北
狂虜未除慮有奔衝須爲控扼亦希付于上將所貴殿
彼一隅伏望陛下道極照臨仁深覆載念臣久司繁重
憫臣方在衰羸退居閑僻從遵養臣無任祈天涯懇
之至帝召崇韜面諭之曰吾在朝城許卿重鎮不許崇
退聞卿與國同休去將安往促復乃位餘勿復言崇

韜因建天下利害二十五事施行之李嗣源爲成德軍

節度使徙崇韜忠武崇韜因自陳權位已極言甚懇至
莊宗曰豈可朕居天下之尊使卿無尺寸之地崇韜辭
不已遂罷其命仍爲侍中樞密使卿無尺寸之地崇韜辭
時取悅人心又請罷樞密院事各歸本司以輕其權然
宦官造謗不已三年堅乞罷兼領節鉞許之害二十五條皆便于冊府元
龜後唐郭崇韜爲侍中樞密使兼領鎮州莊宗謂之曰
吾欲移卿兼領汴州授總管鎮陽節制與李紹斌爲聲
援庶濟軍機崇韜曰計無便於此者因曰臣內筦機務
外預平章日侍天顏手持國柄名位亦已極矣恩寵亦
已加矣如此富貴何假遙領藩方臣中夜思忖歷數創
業功臣有隨陛下降生入死接鋒冒刃而經百餘戰者
今位不過典方州恩不過功臣名號臣惟涯分徒以指
縱畫策仰贊睿謀餘無汗馬之勞今日窮榮極盛陛下
雖私臣恩舊然萬手所指臣何自安臣每瀝懇披陳聖
旨未迴臨照今陛下議安邊事委任勲賢獲臣初心不
勝大願其汴州節制乞陛下擇親王鎮撫臣晝夜思之
汴州關東之會府當天下之要衝地富人繁國之根本

除命親賢勲德不可輕授于人縱臣領之臣又不歸治所令人攝職何異空城臣與國之情議須及此乞不以臣爲慮別慊聖懷取臣芻議爲便帝曰卿言忠蓋子恐奪卿士字乎翼日上章辭節鎮批答云豈可朕居億兆之尊俾卿無尺寸之地卿雖堅讓朕意何安崇輶再表懇瀝批答日朕以卿久司樞要常處重難或遲疑未決之機詢諸先見或憂撓不定之事訪自必成至于贊朕不基登茲大寶收興異論卿獨堅言天命不可違唐祚必須復請納家族明設誓文及其密取汝陽興師入不測之地潛通河口貢謀占必濟之津人所不知卿惟合意迨中都肅聚羣黨窺凌朕決議平妖兼收浚水雖云先定更審前籌果盡贊成悉諳沈算斯卽何須冒及始顯殊庸况常山陸梁正虞未復卿能撫衆共定羣心惟朕知卿他人寧表所以賞卿之寵實異等論沃朕之心非虛渥澤今卿再三謙遜重疊退辭始納常陽請歸上將又稱梁苑不可兼權如此周身貴全名節古人操守未可比方旣覽堅辭難阻來表其再讓汴州所宜依允同光三年夏霖雨不止大水害民田民多流死莊宗患宮中暑濕不可居思得高

樓避暑宦官進曰臣見長安全盛時大明興慶宮樓閣
百數今大內不及故時卿相家莊宗曰吾富有天下豈
不能作一樓乃遣宮苑使王允平營之宦官曰郭崇韜
眉頭不伸嘗爲租庸借財用陛下雖欲有作其可得乎
莊宗乃使人問崇韜曰昔吾與梁對壘于河上雖祁寒
盛暑被甲跨馬不以爲勞今居深宮蔭廣廈不勝其熱
何也崇韜對曰陛下昔以天下爲心今以一身爲意艱
難逸豫爲慮不同其勢自然也願陛下無忘創業之難
常如河上則可使繁暑坐變清涼莊宗默然終遣允平
起樓崇韜果切諫宦官曰崇韜之第無異皇居安知陛

下之熱由是謾間愈入

五代史時近臣勸莊宗以貢奉物爲內庫珍貨山積公府賞軍

不足崇韜奏請出內庫之財以助莊宗沈吟有斬惜之意是時天下已定寇讐外息莊宗漸務華侈以逞己欲洛陽大內宏敞宮宇深邃宦官阿意順旨以希恩寵言宮中夜見鬼物不謀同辭莊宗駭異其事且問其故宦者曰見本朝長安大內六宮嬪御殆及萬人椒房蘭室無不充物今宮室大半空閒鬼神尚幽亦無所怪繇是景進王允平等于諸道採擇宮人不擇良賤內之宮掖三年夏雨河大水壞天津橋是時酷暑尤甚莊宗嘗擇高樓避暑皆不稱旨宦官曰今大內樓觀不及舊時長安卿相之家舊日大明興慶兩宮樓觀百數皆雕楹畫栋千雲蔽日今官家納涼無可御者莊宗曰子富有天下豈不能辦一樓卽令宮苑使經營之猶慮崇韜有所諫止使謂崇韜曰今年惡熱朕須在河上五六月中與賊對壘行宮卑濕介馬戰賊恒若清涼今晏然深宮不耐暑毒何也崇韜奏陛下須在河上汗寇未平廢寢忘食心在戰陣祁寒溽暑不介聖懷今寇旣平中原無事縱耳目之玩不憂戰陣雖層臺百尺廣殿九筵未能忘熱于今日也願陛下思艱難創業之際則今日之暑

生變清涼莊宗默然王允平等竟加營造崇韜復奏日內中營造日有糜費屬當災饉且乞權停不聽河

南縣令羅貫爲人彊直頗爲崇韜所知貫正身奉法不受權豪請託宦官伶人有所求請書積几案一不以報皆以示崇韜崇韜數以爲言宦官伶人由此切齒河南自故唐時張全義爲尹縣令多出其門全義廝養畜之及貫爲之奉全義不屈縣民恃全義爲不法者皆按誅之全義大怒嘗使人告劉皇后從容爲白貫事而左右日夜共攻其短莊宗未有以發皇太后崩葬坤陵陵在壽安莊宗幸陵作所而道路泥塗橋壞莊宗止輿問誰主者宦官曰屬河南因亟召貫貫至對曰臣初不奉詔

請詰主者莊宗曰爾之所部復問何人卽下貫獄獄吏
掠體無完膚明日傳詔殺之崇韜諫曰貫罪無佗橋
道不修法不當死莊宗怒曰太后靈駕將發天子車輿
往來橋道不修卿言無罪是朋黨也崇韜曰貫雖有罪
當具獄行法于有司陛下以萬乘之尊怒一縣令使天
下人言陛下用法不公臣等之過也莊宗曰貫公所愛
任公裁決因起入宮崇韜隨之論不已莊宗自闔殿門
崇韜不得入貫卒見殺五代史羅貫不知何許人進士

及第累歷臺省官自禮部員外郎爲河南令貫爲人強直正身奉法不避權豪時宦官

伶人用事凡請託于貫者其書盈閣一無所報皆以示
郭崇韜因奏其事由是左右每言貫之失先是梁時張
全義專制京畿河南洛陽寮佐皆出其門下事全義如

廝僕及貫受命持本朝事體奉全義稍慢部民爲府司庇護者必奏正之全義怒因令女使告劉皇后從容白于莊宗宦官又言其短莊宗深怒之會莊宗幸壽安山陵道路泥淖莊宗訪其主者宦官日屬河南縣促令召貫至奏曰臣初不奉命請詰稟命者帝曰卿之所部反問他人何也命下府獄府吏搒笞促令伏欵翌日傳詔殺之郭崇韜奏曰貫別無贓狀橋道不修法未當死莊宗怒曰母后靈駕將發天子車輿往來橋道不修是誰之過也崇韜奏曰貫縱有死罪俟欵狀上奏所司議讞以朝典行之死當未晚今以萬乘之尊怒一縣令俾天下人言陛下使法不公矣莊宗曰旣卿所愛任卿裁決因投袂入宮崇韜從而論列莊宗自闔殿門不得入卽令伏法曝屍于府門冤痛之聲聞于遠邇明年征蜀議擇大將時明宗爲總管當行而崇韜以讒見危思立大功爲自安之計乃曰契丹爲患北邊非總管不可禦魏王繼岌國之儲副而大功未立且親王爲元帥唐故事也莊宗曰繼岌小子

豈任大事公爲我擇其副崇韜未及言莊宗曰吾得之

矣無以易卿也乃以繼岌爲西南面行營都統崇韜爲

招討使軍政皆決崇韜

五代史會客省使李嚴使西川迴言王衍可圖之狀莊宗與崇

韜議討伐之謀方擇大將時明宗爲諸道兵馬總管當

行崇韜自以宦者相傾欲立大功以制之乃奏曰契丹

犯邊北面須籍大臣全倚總管鎮禦臣伏念興聖宮使

繼岌德望日隆大功未著宜依故事以親王爲元帥付

以討伐之權俾成其威望莊宗方愛繼岌卽日小兒幼

稚安能獨行卿當擇其副崇韜未奏莊宗曰無踰于卿

者乃以繼岌爲都統崇韜爲招討使是歲九月十八日

率親軍六萬進討蜀川崇韜將發奏曰臣以非才謬當

戎事仗將士之忠力憑陛下之威靈庶幾克捷若西川

平定陛下擇帥如信厚善謀事君有節則孟知祥有焉

望以蜀帥授之如宰輔闕人張憲有披拂之勞爲人謹

重而多識其次李琪崔居儉中朝士族富有文學可擇

而任之莊宗御嘉慶殿置酒宴征西諸將舉酒屬崇韜

曰繼岌未習軍政卿久從吾戰伐西面之事屬之于卿

軍發十月十九日入大散關崇韜以馬鎗指山險謂魏王曰朝廷與師十萬已入此中儻不成功安有歸路今岐下飛輓才支旬日必須先取鳳州收其儲積方濟吾事乃令李嚴康延孝先馳書檄以諭僞鳳州節度使王承捷及大軍至承捷果以城降得兵八千軍儲四十萬次至故鎮僞命屯駐指揮使唐景思亦以城降得兵四千又下三泉得軍儲三十餘萬自是師無匱乏軍聲大振其招懷制置官吏補置師行籌畫軍書告諭皆出于崇韜繼岌唐軍入蜀所過迎降王衍弟宗弼陰送款于承命而已唐軍入蜀悉取衍嬪妓珍寶奉崇韜及其子崇韜求爲西川兵馬畱後崇韜以節度使許之軍至成都宗弼遷衍于西宮悉取衍嬪妓珍寶奉崇韜及其子廷誨又與蜀人列狀見魏王請崇韜畱鎮蜀繼岌頗疑沒其家財蜀人大恐崇韜素嫉宦官嘗謂繼岌曰王有

破蜀功師旋必爲太子俟主上千秋萬歲後當盡去宦官至子騎馬亦不可騎繼岌監軍李從襲等見崇韜專任軍事心已不平及聞此言遂皆切齒思有以圖之莊宗聞破蜀遣宦官向延嗣勞軍崇韜不郊迎延嗣大怒因與從襲等共構之延嗣還上蜀簿得兵三十萬馬九千五百匹兵器七百萬糧一百五十三萬石錢一百九十二萬緡金銀二十二萬兩珠玉犀象二萬支錦綾羅五十萬匹莊宗曰人言蜀天下之富國也所得止于此耶延嗣因言蜀之寶貨皆入崇韜且誣其有異志將危魏王莊宗怒遣宦官馬彥珪至蜀視崇韜去就彥珪以

告劉皇后劉皇后教彥珪矯詔魏王殺之崇韜有子五

卽位詔許歸葬以其太原故宅賜其一孫

五代史莊宗令內官李廷

安李從襲呂知柔爲都統府紀綱見崇韜幕府繁重將吏輒輕降人爭先賂遺都統府唯大將省謁牙門索然由是大爲詬恥及六軍使王宗弼歸欵行賂先招討府王衍以成都降崇韜居王宗弼之第宗弼選王衍之妓妾珍玩以奉崇韜求爲蜀帥又與崇韜子廷誨謀令蜀人列狀見魏王請奏崇韜爲蜀帥繼岌覽狀謂崇韜曰主上倚侍中如衡華安肯棄元老於蠻夷之地況余不敢議此李從襲等謂繼岌曰郭公收蜀部人情意在難測王宜自備由是兩相猜察莊宗令中官向延嗣賚詔至蜀促班師詔使至崇韜不郊迎延嗣憤憤從襲謂之曰魏王貴太子也主上萬福郭公專弄威柄旁若無人昨令蜀人請已爲帥郭廷誨擁徒出入貴擬王者所與狎遊無非軍中驍果蜀中凶豪晝夜妓樂歡宴指天畫地父子如此可見其心今諸軍將校無非郭氏之黨魏

王懸軍孤弱一朝班師必恐紛亂吾屬莫知暴骨之所
因相向垂涕延嗣使還具奏皇后泣告莊宗乞保全繼
岌莊宗復閲蜀簿曰人言蜀中金玉珠銀不知其數何
如是之微也延嗣奏曰臣聞蜀人知蜀中寶貨皆入崇
韜之門言崇韜得金萬兩銀四十萬名馬千匹王衍愛
妓六十樂工百犀玉帶百廷誨自有金銀十萬兩犀玉
帶五十藝色絕妓七十樂工七十他財稱是魏王府蜀
人賂遺不過匹馬而已莊宗初聞崇韜欲畱蜀心已不
平又聞全有蜀之妓樂珍玩怒見顏色卽令中官馬彥
珪馳入蜀視崇韜去就如班師則已如實遲畱則與繼
岌圖之彥珪見皇后日禍機之發間不容髮何能數千
里外復稟聖旨哉皇后再言之莊宗曰未知事之實否
詎可便令果決皇后乃自爲敍與繼岌令殺崇韜時蜀
土初平山林多盜孟知祥未至崇韜令任圜張筠分道
招撫慮師還後部曲不寧故歸期稍緩四年正月六日
馬彥珪至軍決取十二日發成都赴闕令任圜權知畱
事以俟知祥諸軍部署已定彥珪出皇后敍以示繼岌
繼岌曰大軍將發他無釁端安得爲此負心事公輩勿
復言從襲等泣曰聖上旣有口敕王若不行苟中途事
泄爲患轉深繼岌曰上無詔書徒以皇后敍令安得殺

招討使從襲等巧造事端以間之繼岌旣無英斷僥倖從之詰旦從襲以繼岌之命召崇韜計事繼岌登樓避之崇韜入左右撾殺之崇韜有子五人廷訓廷誨隨父死于蜀廷說誅于洛陽廷讓誅于魏州廷議誅于太原家產籍沒明宗卽位詔令歸葬仍賜太原舊宅廷誨廷讓各有幼子一人姻族保之獲免崇韜妻周氏携養于太祖當崇韜用事時自宰相豆盧草韋說等皆傾附之崇韜父諱宏草等卽因佗事奏改宏文館爲崇文館五代會要後唐同光三年七月宏文館奏請依六典故事改宏文館爲崇文館比與宏文館並置今請改稱頗協舊典從之時樞密院郭崇韜父名宏豆盧草希意奏改之故有宏文並置之言以其姓郭因以爲子儀之後崇韜遂以爲然其伐蜀也過子儀墓下馬號慟而去聞者頗以爲笑然崇韜盡忠國家有大畧其已破蜀因遣使者以唐威德風誦南詔諸蠻欲因以

綏來之可謂有志矣

五代文崇韜服勤盡節佐佑王家草昧艱難功無與比西平巴蜀宣

暢皇威身死之日夷夏寃之然議者以崇韜功烈雖多事權太重不能處身量力而聽小人誤計欲取太山之安如急行避跡其禍愈速性復剛戾遇事便發旣不知前代之成敗又未體當時之物情以天下爲已任孟浪之甚也及權傾四海車騎盈門士人譖奉漸別流品同列豆盧草謂崇韜曰汾陽王代北人徙家華陰侍中世在雁門得非福德歟崇韜應曰經亂失譖謨先人嘗云去汾陽王四世草日故祖德也因是旌別流品援引簿徒委之心腹佐命勲舊一切鄙棄舊寮有干進者崇韜謂之曰公雖代邸之舊然家無門閥深知公才技不敢驟進者慮名流嗤余故也及征蜀之行于興平拜尚父子儀之墓嘗從容白繼岌曰蜀平之後王爲太子待千秋萬歲神器在手宜盡去宦官優禮士族不唯疎斥闡宿將戟手痛心掇其族滅之禍有自來矣復以諸子騎縱不法既定蜀川輦運珍貨實于洛陽之第籍沒之日泥封尙濕雖莊宗季年爲羣小所惑致功臣不保其終亦崇韜自貽其災禍也史臣曰夫出身事主得位遭時

功不可以不圖名不可以不立洎功成而名遂則望重
而身危貝錦於是成文良玉以之先折故崇韜之誅益
爲此也是知強吳滅而范蠡去全齊下而樂生奔苟非
其賢孰免其禍明哲之士當鑒于斯

蘇轍郭崇韜論

國無讐而後可以伐人冒讐以伐人敵無讐則已受其
災敵有讐則我與敵皆斃楚靈王殘民以逞舉思亂之
民以伐吳吳不可動而棄疾攻之若攻虛邑靈王遂死
于外齊湣王貪而好勝不知宋之不可攻而忘齊固之
旣病燕師乘之遂以失國自古冒讐以攻人其禍若此
唐莊宗勇而善戰與梁人夾河相攻十戰九勝涉河取
鄆不十日而克梁威震諸國五代用兵未有神速若此
者也然其克敵之後幸一日之安沈湎聲色之娛宦官
伶人交亂其政府庫之積罄于耳目之奉民怨兵怒國
有土崩之勢而不知也一時功臣皆武夫崛起未有識
安危之機者唯樞密使郭崇韜智勇兼人知其不可力
深病之不見聽求去而不見許中外僂倖視之側目崇
魏王繼岌爲元帥而已爲之副將兵六萬以出兵不逾以
時方欲伐蜀崇韜欲立功爲自安之計議以韜力知蜀
之易舉而不知唐之已亂挈其良將勁兵西行數

千里雖立大功而不免讒死於蜀征蜀之兵未還而趙在禮爲亂河朔明宗北征遂與在禮皆反帥兵南向克汴入洛遂無一人能禦之者向使西師不克出蜀雖未以下而京師有重兵崇韜不死禍福未可知也崇韜冒險以伐人蹈齊湣之亂而以爲安惜其有智而未始學也何去非郭崇韜論後唐莊宗承武皇之遺業假大義挾世讐以與梁人百戰而夷之乃有天下可謂難且勞矣然有二臣焉其爲韓彭者李嗣源爲寇鄧者郭崇韜也嗣源居不賞之功挾震主之威得國兵之權執之而不釋也莊宗無以奪之而稍忌其逼崇韜嘗有大功于國忠而可倚而嗣源之所畏者也莊宗苟能挾所可倚而制所可忌則嗣源雖懷不自安而有顧憚非敢輒發也莊宗知其所忌而不知其所倚故崇韜以忠見疎讒嫉日急使其營自救之計乃求將其征蜀之兵莊宗掃國中之師屬之而西崇韜雖已舉蜀捷奏才上而以讒死矣莊宗知得蜀足以資其盛彊而不知崇韜之死已去嗣源之畏故鄆下之變嗣源以一旅之衆而趨洛陽如蹈無人之境其遷大器易若反掌且內有彊臣窺伺間隙乃空國之師勤於遠役固已大失計矣而又去我之所倚與彼之所畏者則大禍之集可勝救哉雖得百

蜀無救其失國也使崇韜之不死舉全蜀之衆因東歸之士擁繼岌檄方鎮以討君父之讐雖嗣源之強亦何以禦之蓋嗣源有韓彭之逼而不踐其禍者莊宗無高祖之畧故也崇韜有寇鄧之烈而不全其宗者莊宗無光武之明故也嗟乎人臣之禍起于操權而速禍之權莫重於制兵崇韜謀追禍自全而方求執其兵此於抱薪救火者何異也

安重誨應州人也其父福遷事晉爲將以驍勇知名梁攻朱宣于鄆州晉兵救宣宣敗福遷戰死五代史安重部豪長父福遷爲河東將救充鄆而沒重誨少事明宗爲人明敏謹恪明宗鎮安國以爲中門使及兵變于魏所與謀議大計皆重誨與霍彥威決之明宗卽位以爲左領軍衛大將軍樞密使兼領山南東道節度使固辭不拜改兵部尚書

使如故在位六年累加侍中兼中書令

五代史重誨自明宗龍潛時得

給事左右及鎮邢州以重誨爲中門使隨從征討凡十餘年委信無間勤勞亦至洎鄆城之變佐命之功獨居其右明宗踐阼領樞密使俄遷左領軍衛大將軍充職

重誨自爲中門使已見親

信而以佐命功臣處機密之任事無大小皆所參決其勢傾動天下雖其盡忠勞力時有補益而恃功矜寵威福自出旁無賢人君子之助其獨見之慮禍釁所生至于臣主俱傷幾滅其族斯其可哀者也重誨嘗出過御史臺門殿直馬延誤衝其前導重誨怒卽臺門斬延而後奏是時隨駕廳子軍士桑宏遷殿傷相州錄事參軍親從兵馬使安虔走馬衝宰相前導宏遷罪死虔決杖

而已重誨已斬延乃請降勅處分明宗不得已從之由是御史諫官無敢言者宰相任圜判三司以其職事與重誨爭不能得圜怒辭疾退居於磁州朱守殷以汴州反重誨遣人矯詔馳至其家殺圜而後白誣圜與守殷通謀明宗皆不能詰也而重誨恐天下議已因取三司積欠二百餘萬請放之冀以悅人而塞責明宗不得已爲下詔蠲除之其威福自出多此類也是時四方奏事皆先白重誨然後聞河南縣獻嘉禾一莖五穗重誨視之曰僞也笞其人而遣之夏州李仁福進白鷹重誨却之明日白曰陛下詔天下毋得獻鷹鶴而仁福違詔獻

鷹臣已却之矣重誨出明宗陰遣人取之以入佗日按
鷹于西郊戒左右無使重誨知也宿州進白兔重誨曰
兔陰且狡雖白何爲遂却而不白明宗爲人雖寬厚然
其性夷狄果于殺人馬牧軍使田令方所牧馬瘠而多
斃坐劾當死重誨諫曰使天下聞以馬故殺一軍使是
謂貴畜而賤人令方因得減死明宗遣回鶻侯三馳傳
至其國侯三至醴泉縣縣素僻無驛馬其令劉知章出
獵不時給馬侯三遽以聞明宗大怒械知章至京師將
殺之重誨從容爲言知章乃得不死其盡忠補益亦此
類也五代史明宗遣回鶻侯三馳傳至其國侯三至醴
泉縣縣素僻無驛馬縣令劉知章出獵不時給馬

侯三遽以聞明宗大怒械知章至將殺之重誨從容爲言乃得不死重誨旣以天下爲已任遂欲內爲社稷之計而外制諸侯之彊然其輕信韓攻之譖而絕錢鏐之臣徒陷彥溫于死而不能去潞王之患李嚴一出而知祥貳仁矩未至而董璋叛四方騷動師旅並興如投膏止火適足速之此所謂獨見之慮禍釀所生也錢鏐據有兩浙號兼吳越而王自梁及莊宗常異其禮以羈縻臣屬之而已明宗卽位鏐遣使朝京師寓書重誨其禮慢重誨怒未有以發乃遣其嬖吏韓攻副供奉官烏昭遇復使于鏐而攻恃重誨勢數凌辱昭遇因醉使酒以馬鞭擊之鏐欲奏其事昭遇以爲

辱國固止之及攷還反譖于重誨曰昭遇見鏐舞蹈稱臣而以朝廷事私告鏐昭遇坐死御史獄乃下制削奪鏐官爵以太師致仕于是錢氏遂絕于唐矣潞王從珂爲河中節度使重誨以謂從珂非李氏子後必爲國家患乃欲陰圖之從珂閱馬黃龍莊其牙內指揮使楊彥溫閉城以叛從珂遣人謂彥溫曰我遇汝厚何苦而反彥報曰彥溫非叛也得樞密院宣請公趣歸朝廷耳從珂走虞鄉馳騎上變明宗疑其事不明欲究其所以乃遣殿直都知范氳以金帶襲衣金鞍勒馬賜彥溫拜彥溫絳州刺史以誘致之重誨固請用兵明宗不得已乃

遣侍衛指揮使藥彥稠西京留守索自通率兵討之而
戒曰爲我生致彥溫吾將自訊其事彥稠等攻破河中
希重誨旨斬彥溫以滅口重誨率羣臣稱賀明宗大怒
曰朕家事不了卿等不合致賀從珂罷鎮居清化里第
重誨數諷宰相言從珂失守宜得罪馮道因白請行法
明宗怒曰吾兒爲姦人所中事未辨明公等出此言是
不欲容吾兒人間邪趙鳳因言春秋責帥之義所以勵
爲臣者明宗曰皆非公等意也道等惶恐而退居數日
道等又以爲請明宗顧左右而言佗明日重誨乃自論
列明宗曰公欲如何處置 即從公重誨曰此父子之

際非臣所宜言惟陛下裁之明宗曰吾爲小侯時衣食

不能自足此兒爲我擔石灰拾馬糞以相養活今貴爲

天子獨不能庇之邪使其杜門私第亦何與公事重誨

由是不復敢言

冊府元龜長興元年四月十八日收復河中斬楊彥溫傳首來獻初彥溫莊宗

朝累遷裨將天成初末帝出鎮河中奏爲衙將善遇之至是彥溫承安重誨意乘末帝閻馬於黃龍莊據州城謀叛末帝尋遣人詰之曰吾善待汝何苦爲叛彥溫報日某非敢負恩緣奉樞密院宣頭令某拒命請相公但歸朝廷蒲民感末帝惠養之恩揭竿持挺敵彥溫之徒者甚衆竟以堅甲利兵不勝而退數日詔末帝歸朝帝疑其詐不欲興兵授彥溫絳州刺史安重誨堅請出師卽命西京留守索自通侍衛步軍都指揮使藥彥稠等率兵攻之五日而敗自閉門及敗凡十三日初彥稠出送帝怒彥稠等時議者以當時四海帖然五兵載戢蒲非邊郡近在國門而彥溫安敢狂悖皆以爲安重誨方

弄權柄從榮等諸王敬事不暇獨忌末帝威名夙著已
素在其下每于帝前屢言其短帝旣鍾慈愛不聽重誨
巧作規圖冀能傾陷也彥溫旣誅末帝在清化宅重誨
謂馮道等曰蒲帥失守責帥之義法當如何公等安得
誠言重誨諷道等論列欲致末帝于有過之地翌日起
居馮道奏合行朝典帝不悅謂宰臣曰吾兒爲奸黨所
傾未明阜白公等發此言是不欲留在人間也趙鳳堅
奏春秋責帥之義所以激勵藩守帝曰皆非公等意也
二人惶悚而退居數日帝于中興殿見宰臣趙鳳承重
誨意又再論列帝問侍臣他事無所言翼日重誨復自
論列帝曰卿欲如何制置吾便隨汝重誨曰於陛下父
子之間臣不合若言一稟聖旨帝曰從他私地閒坐何
煩奏也

孟知祥鎮西川董璋鎮東川二人皆有異志重
誨每事裁抑務制其姦心凡兩川守將更代多用已所
親信必以精兵從之漸令分戍諸州以虞緩急二人覺
之以爲圖已益不自安

五代史補初知祥將據蜀也且上表乞收家屬時樞密使安重

誨用事拒其請知祥日吾知之矣因使密以金百兩爲賂重誨喜而爲敷奏詔許之及家屬至知祥對僚吏笑曰天下聞知樞密將謂天地間未有此誰知只消此百金耶亦不足畏也遂守險拒命既而遣李

嚴爲西川監軍知祥大怒卽日斬嚴又分閬州爲保寧

軍以李仁矩爲節度使以制璋且削其地璋以兵攻殺

仁矩二人遂皆反唐兵戍蜀者積三萬人其後知祥殺

璋兼據兩川而唐之精兵皆陷蜀初明宗幸汴州重誨

建議欲因以伐吳而明宗難之其後戶部尚書李鏗得

吳謀者言徐知誥欲舉吳國以稱藩願得安公一言以

爲信鏗卽引謀者見重誨大喜以爲然乃以王帶

與謀者使遺知誥爲信其直千緡五代史明宗幸汴州重誨建議欲因以伐

淮南明宗難之其後李鏌得淮南謀者言徐知誥欲奉
其國稱藩臣願得安令公一言爲信鏌卽引謀者見重
誨重誥大喜以爲然乃以玉帶與
謀者使遺知誥爲信其直千緡初不以其事聞其後

逾年知誥之間不至始奏貶鏌行軍司馬已而捧聖都

軍使李行德十將張儉告變言樞密承旨李虔徽語其

客邊彥溫云重誨私募士卒繕治兵器欲自伐吳又與

相者交私明宗以問重誨重誨惶恐請究其事明宗初

頗疑之大臣左右皆爲之辨旣而少解始告重誨以彥

溫之言因廷詰彥溫具伏其詐于是君臣相顧泣下

五代

史重誨爲樞密使四五年間獨綱大任否臧自若環衛
酋長貴戚近習無敢干政者弟牧鄆州子鎮懷孟身爲
中令任過其才議者謂必有覆餗之禍無何有吏人李
凌徽弟揚言于眾云聞相者言其貴不可言今將統軍

征淮南時有軍將密以是聞頗駭上聽明宗謂重誨曰
卿樹心腹私市兵仗欲自討淮南有之否重誨惶恐
奏曰興師命將出自宸衷必是奸人結構臣願陛下窮
詰所言者翼日帝召侍衛指揮使安從進藥彥稠等謂
之曰有人告安重誨私置兵仗將不利于社稷其若之
何從進等奏曰此是奸人結構離間陛下動舊且重誨
事陛下三十年從微至著無不盡心今日何苦乃解
圖不軌臣等以家屬保明必無此事帝意乃解 彦溫
行德儉皆坐族誅重誨因求解職明宗慰之曰事已辨
慎無措之胸中重誨論請不已明宗怒曰放卿去朕不
患無人顧武德使孟漢瓊至中書趣馮道等議代重誨
者馮道曰諸君苟惜安公使得罷去是紓其禍也趙鳳
以爲大臣不可輕動遂以范延光爲樞密使而重誨居
職如故五代史重誨三上表乞解機務詔不允復面奏
乞與臣一鎮以息謗議明宗不悅重誨奏不已

明宗怒謂日放卿出朕自有人卽令武德使孟漢瓊至中書與宰臣商量重誨事馮道言曰諸人苟惜安令公解樞務爲便趙鳳曰大臣豈可輕動公失言也道等因附漢瓊奏曰此斷自宸旨然重臣不可輕議移改由是兼命范廷光爲樞密使之重誨如故董璋等反遣石敬瑭討之而川路險

阻糧運甚艱每費一石而致一斗自關以西民苦輸送往往亡聚山林爲盜賊明宗謂重誨曰事勢如此吾當自行重誨曰此臣之責也乃請行關西之人聞重誨來皆已恐動而重誨曰馳數百里遠近驚駭督趣糧運日夜不絕斃踣道路者不可勝數五代史時以東川帥董璋恃險難制乃以武虔裕爲綿州刺史董璋益懷疑忌遂縛虔裕以叛及石敬瑭領王師伐蜀峽路艱阻糧運不繼明宗憂之而重誨請行翌日領數騎而出日馳數百里西諸侯聞之莫不惶駭所在錢帛糧料星夜輦運人乘斃踣于山路者不

可勝紀百
姓苦之

重誨過鳳翔節度使朱宏昭延之寢室使其

妻子奉事左右甚謹重誨酒酣爲宏昭言昨被讒搆幾不自全賴人主聖明得保家族因感歎泣下重誨去宏昭馳騎上言重誨怨望不可令至行營恐其生事而宣徽使孟漢瓊自行營使還亦言西人震駭之狀因述重誨過惡重誨行至三泉被召還過鳳翔宏昭拒而不納重誨懼馳趨京師未至拜河中節度使重誨已罷希旨者爭求其過宦者安希倫坐與重誨交私嘗爲重誨陰伺宮中動息事發棄市重誨益懼因上章告老以太子太師致仕而以李從璋爲河中節度使遣藥彥稠率兵

如河中虞變重誨二子崇緒崇贊宿衛京師聞制下卽日奔其父重誨見之驚曰二渠安得來已而曰此非渠意爲人所使耳吾以一死報國餘復何言乃械送二子于京師行至陝州下獄明宗又遣翟光業至河中視重誨去就戒曰有異志則與從璋圖之又遣宦者使于重誨使者見重誨號泣不已重誨問其故使者曰人言公有異志朝廷遣藥彥稠率兵至矣重誨曰吾死未塞責遽勞朝廷興師以重明主之憂光業至從璋率兵圍重誨第入拜于庭重誨降而答拜從璋以燭擊其首重誨妻走抱之而呼曰令公死未晚何遽如此又擊其首夫

妻皆死流血盈庭從璋檢責其家貲不及數千緡而已

爲罪并殺其二子其餘子孫皆免

五代史重誨至鳳翔節度使朱宏昭延于

寢室令妻子奉食器敬事尤謹

重誨坐中言及昨有人

讒搆幾不保全賴聖上保鑒苟獲全族因泣下重誨旣

辭宏昭遣人具奏重誨怨望出惡言不可令至行營恐

奪石敬瑭兵柄而宣徽使孟漢瓊自西迴亦奏重誨已

至三泉復令歸闕再過鳳翔朱宏昭拒而不納重誨懼

急騎奔程未至京師制授河中帥旣至鎮心不自安遂

請致仕制初下其子崇贊崇緒走歸河中二子初至重

誨駭然曰渠安得來家人欲問故重誨曰吾知之矣此

非渠意是他人教來吾但以一死報國家餘復何言翌

日中使至見重誨號泣久之重誨曰公但言其故勿過

相愍中使曰人言令公據城異志矣重誨曰吾一死未

塞責已負君親安敢輒懷異志遽勞朝廷興師增聖上

宵旰則僕之罪更萬萬矣時遣翟光鄴使河中如察重

誨有異志則誅之旣至李從璋自率甲士圍其第仍拜

重誨于其庭重誨下階迎拜曰太傅過禮俛首方拜從
璋以撻擊其首其妻驚走抱之日令公死亦不逞太傅
何遽如此并擊重誨妻首碎竝剝其衣服夫妻裸形踣
于廊下血流盈庭翌日副使判官白從璋願以衣服覆
其屍堅請方許及從璋疏重誨家財不及數千緡議者
以重誨有經綸社稷之大功然志大才短不能迴避權
龍親禮士大夫求周身輔國之遠圖而悉自恣胸襟果貽顛覆

重誨得罪知其必死歎

曰我固當死但恨不與國家除去潞王此其恨也

史闕

文明宗令翟光鄭李從璋誅重誨于河中私第從
翟奮撻擊重誨于地重誨曰某死無恨但恨不與官家誅得
潞王他日必爲朝廷之患言終而絕臣謹按明宗實錄
是清泰帝朝修撰潞王卽清泰帝也史臣避諱不敢直
書嗚呼重誨之志節泯矣

嗚呼官失其職久矣予讀梁宣底

退朝錄凡公家文書

密院謂之底三司謂之檢今秘府有梁朝宣底二卷卽
貞明中崇政院書也檢卽州縣通稱焉又樞密院門

降宣故事具典故申院按今有梁朝宣底二卷載朱梁
貞明三年四年事每事下有月日云臣李振宣或除官
差官或宣事於方鎮等處其間有云宣頭宣命宣旨者
梁朝以樞密院爲崇政院始置使以大臣領之任以政
事貞明年是李振爲使當時以宣傳上旨故名之曰宣
而樞密院所出文字之名也似欲與中書勅並行雖無
所明見疑降宣始自朱梁之時晉天福五年改樞密院
承旨爲承宣亦似相合其底乃底本也繫日月姓名者
此所以爲底聞今尙仍舊名熙寧七年月十三日夢
溪筆談子及史館檢討時議密院劄子問宣頭所起子
按唐故事中書舍人職掌語詔皆寫四本一本爲底一
本爲宣此宣謂行出耳未以名書也晚唐樞密使自禁
中受旨出付中書卽謂之宣中書承受錄之於籍謂之
宣底今史館中尙有故宣底二卷如今之聖語簿也梁
朝初置崇政院專行密命至後唐莊宗復樞密使郭崇
韜安重誨爲之始分領政事不關由中書直行下者謂
之宣如中書之勅小事則發頭子擬堂帖也至今樞院
用宣及頭子本朝樞密院亦用劄子但中書劄子宰相
押字在上次相及參相以次向下樞密劄子樞長押字
在下副貳以次向上以此爲別頭子唯給驛馬之類用

之見敬翔李振爲崇政院使凡承上之旨宣之宰相而奉行之宰相有非其見時而事當上決者與其被旨而有所復請者則具記事而入原注記事若今學士院詔往來謂之簡帖俚俗猶謂之記事也報今士大夫間以文字相因崇政使以聞得旨則復宣而出之梁之崇政使乃唐樞密之職蓋出納之任也唐常以宦者爲之至梁戒其禍始更用士人其備顧問參謀議於中則有之未始專行事於外也至崇韜重誨爲之始復唐樞密之名然權侔於宰相矣後世因之遂分爲二文事任宰相武事任樞密樞密之任旣重而宰相自此失其職也

文獻通考按樞密之名始於唐代宗寵任宦者故置內樞密使使之掌機密文書如漢之中書

謁者令是也若內中處分則令內樞密使宣付中書門下施行則其權任已侔宰相至僖昭間楊復恭西門季元之徒遂至於視事行文書矣昭宗天復元年既誅劉季述乃救近年宰相延英奏事樞密院侍側爭論紛然旣出又稱上旨未允復有改易撓權亂政自今並依大中舊制俟宰相奏事畢方得升殿承受公事蓋當時所謂樞密使者專橫如此朱梁憲唐弊不用宦者然徒知宦者之不可用而不知樞密院之不必存也乃復改爲崇政院以敬翔爲使至後唐而復樞密院郭崇韜安重晦相繼領其事皆腹心大臣則是宰相之外復有宰相三省之外復有一省矣宋興始以樞密與中書對持文武二柄號稱二府然後樞密院之設始專有職掌不爲

五代史記卷二十四

五代史記卷第二十五

廬陵歐陽脩撰

徐無黨原注

南昌彭元瑞注

劉鳳誥排次

唐臣傳第十三

周德威字鎮遠朔州馬邑人也爲人勇而多智能望塵以知敵數其狀貌雄偉笑不改容人見之凜如也

五代史圖

德威字鎮遠小字陽五朔州馬邑人也初事武皇爲帳中騎督驍勇便騎射膽氣智數皆過人久在雲中諸熟
邊事望烟塵之事晉王爲騎將稍遷鐵林軍使從破王
警懸知兵勢

行瑜以功遷內衙指揮使其小字陽五當梁晉之際周陽王之勇聞天下梁軍圍晉太原下令軍中曰能生得

周陽五者爲刺史有驍將陳章者號陳野父常乘白馬被朱甲以自異出入陣中求周陽五欲必生致之晉王威德威目陳野父欲得汝以求刺史見白馬朱甲者宜善備之德威笑曰陳章好大言耳安知刺史非臣作邪因戒其部兵曰見白馬朱甲者當佯走以避之兩軍皆陣德威微服雜卒伍中陳章出挑戰兵始交德威部下見白馬朱甲者因退走章果奮稍急追之德威伺章已過揮鐵鎚擊之中章墮馬遂生擒之

五代史乾寧中爲
鐵林軍使從武皇

討王行瑜以功加檢校左僕射移內衙軍副光化二年
三月汴將氏叔琮率衆逼太原有陳章者以虓勇知名
衆謂之夜叉言于叔琮曰晉人所恃者周陽五願擒之
請賞以郡陳章嘗乘驥馬朱甲以自異武皇威德威日

我聞陳夜叉欲取爾求郡宜善備之德威曰陳章大言
未知鹿死誰手他日致師戒部下曰如陣上見陳夜叉
爾等但走德威微服挑戰部下僞退陳章縱追之
德威背揮鐵錘擊墜馬生獲以獻由是知名梁攻燕

晉遺德威將五萬人爲燕攻梁取潞州遷代州刺史內

外蕃漢馬步軍都指揮使

五代史天復中我師不利于
藩縣汴將朱友寧氏叔琮來

逼晉陽時諸軍未集城中大恐德威與李嗣昭選募銳

兵出諸門攻其壘擒生斬馘汴人枝梧不暇乃退天祐

三年與李嗣昭合燕軍攻潞州降丁會以功加檢校太

保代州刺史代嗣昭爲蕃漢都將李思安之冠潞州也

德威軍于余吾時汴軍十萬築夾城圍潞州內外斷絕

德威以精騎薄之屢敗汴人進營高河令遊騎邀其芻

牧汴軍閉壁不出乃自東門山口築甬道樹柵以通夾

城德威之騎軍倒牆堙塹日數十戰前後俘馘不可勝

紀梁有驍將黃角鷹梁軍捨燕攻潞圍以夾城潞州守

方骨齧皆生致之

二二二

卷三

二

昭與德威素有隙晉王病且革語莊宗曰梁軍圍潞而德威與嗣昭有隙吾甚憂之王喪在殯莊宗新立殺其叔父克寧國中未定而晉之重兵悉屬德威于外晉人皆恐莊宗使人以喪及克寧之難告德威且召其軍德威聞命卽日還軍太原留其兵城外徒步而入伏梓宮前慟哭幾絕晉人乃安遂從莊宗復擊梁軍破夾城與李嗣昭歡如初以破夾城功拜振武節度使同中書門下平章事五代史五年正月武皇疾篤德威退營亂柳武皇厭代四月命德威班師時莊宗初立德威外握兵柄頗有浮議內外憂之德威旣至單騎入謁伏靈柩哭哀不自勝由是羣情釋然是月二十四日從莊宗再援潞州二十九日德威前軍營橫礪距潞四十里五月朔晨霧晦暝王師伏于三垂岡下翌日直趨

夾城斬關破壘梁人大敗解潞州之圍初德威與李嗣昭有私憾武皇臨終顧謂莊宗曰進通忠孝不負我重圍累年似與德威有隙以吾命諭之若不解重圍歿有遺恨莊宗達遺旨德威感泣由是勵力堅戰竟破強敵

與嗣昭歡愛如初以功加檢校太保同平章事振武節度使祐七年卽梁開平四年也以梁太祖紀唐莊宗紀王景仁王鎔傳校之皆是開平四年冬十一月獨此傳以爲

秋誤梁遣王景仁將魏滑汴宋等兵七萬人擊趙趙王

王鎔乞師于晉晉遣德威先屯趙州冬梁軍至于柏鄉趙人告急莊宗自將出贊皇會德威于石橋進距柏鄉五里營于野河北晉兵少而景仁所將神威龍驤拱宸等皆梁精兵人馬鎧甲飾以組綉金銀其光耀日晉軍望之色動德威勉其衆曰此汴宋傭賊兒徒飾其外耳

其中不足懼也其一甲之直數十千得之適足爲吾資
無徒望而愛之當勉以往取也退而告于莊宗曰梁兵
甚銳未可與爭宜少退以待之莊宗曰吾提孤軍出千
里其利速戰今不乘勢急擊之使敵知吾之衆寡則吾
無所施矣德威曰不然趙人能城守而不能野戰吾之
取勝利在騎兵平川廣野騎兵之所長也今吾軍于河
上迫賊營門非吾用長之地也莊宗不悅退卧帳中諸
將無敢入見德威謂監軍張承業曰王怒老兵不速戰
者非怯也且吾兵少而臨賊營門所恃者一水隔耳使
梁得舟楫渡河吾無類矣不如退軍鄗邑誘敵出營擾

而勞之可以策勝也承業入言曰德威老將知兵願無
忽其言莊宗遽起日吾方思之耳已而德威獲梁遊兵
問景仁何爲日治舟數百將以爲浮梁德威引與俱見
莊宗笑曰果如公所料乃退軍鄗邑德威晨遣三百騎
叩梁營挑戰自以勁兵三千繼之景仁怒悉其軍以出
與德威轉鬪數十里至于鄗南兩軍皆陣梁軍橫亘六
七里汴宋之軍居西魏滑之軍居東莊宗策馬登高望
而喜曰平原淺草可前可却真吾之勝地也乃使人告
德威曰吾當爲公先公可繼進德威持馬諫曰梁軍輕
出而遠來與吾轉戰其來必不暇齎糧糗縱其能齎亦

不暇食不及日午人馬俱餓因其將退而擊之勝諸將亦皆以爲然至未申時梁軍東偏塵起德威鼓譟而進麾其西偏曰魏滑軍走矣又麾其東偏曰梁軍走矣梁陣動不可復整乃皆走遂大敗自鄗追至柏鄉橫尸數十里景仁以十餘騎僅而免自梁與晉爭凡數十戰其大敗未嘗如此五代史六年岐人攻靈夏遣使來求助管七年十一月汴人據深冀汴將王景仁軍八萬次柏鄉鎮州節度使王鎔來告難帝遣德威率前軍出井陘屯於趙州十二月帝親征二十五日進薄汴營距柏鄉五里營于野河上汴將韓勑率精兵三萬鎧甲皆被繪綺金銀炫曜望之森然我軍懼形于色德威謂李存璋曰賊結陣而來觀其形勢志不在戰欲以兵甲耀威耳我軍人乍見其來謂其鋒不可當此時不挫其銳吾軍不振矣乃遣存璋諭諸軍曰爾見此賊軍否是汴州天

武健兒皆屠沽僥倖虛有表耳縱被精甲十不當獲足以爲資德威自率精騎擊其兩偏左馳右決出沒數四是日獲賊百餘人賊渡河而退德威謂莊宗曰我提孤軍救難解紛三鎮烏合之衆利在速戰卿欲持重吾懼其不可使也德威曰鎮定之士長于守城列陣野戰素非便習我師破賊唯恃騎軍平原廣野易爲施功今壓賊營令彼見我虛實則勝負未可必也莊宗不悅退卧帳中德威患之謂監軍張承業曰王欲速戰將烏合之徒欲當劇賊所謂不量力也去賊咫尺限此一渠水彼若早夜以突厥狃狃渡之吾族其爲伴矣若退軍鄗邑引賊離營彼出則歸復以輕騎掠其芻餉不踰月敗賊必矣承業入言莊宗乃釋然德威得降人問之景仁下令造浮橋數日果如德威所料二十七日乃退軍保鄗邑八年正月二日德威率騎軍致師于柏鄉設伏于村塢間令三百騎以壓汴營王景仁悉其衆結陣而來德威轉戰而退軍因而乘之至于鄗邑南時步軍未成列德威陣騎軍上以抗之亭午兩軍皆陣莊宗問戰時德威曰汴軍氣盛可以勞逸制之造次輕力殆難與敵古者師行不踰舍蓋慮糧餉不給士有飢色今賊遠來決戰縱挾糗糧

將必求退乘其勞弊以生兵制之縱不大敗偏師必喪
爲右廣宋汴之人爲左廣日未至申陣勢稍却德威麾
軍呼曰汴軍走矣塵埃漲天魏人收軍漸退莊宗與史
建塘安金全等因衝其陣夾攻之大敗汴軍殺戮殆盡
王景仁李思安僅以身免獲將校二百八十人劉守光僭號于燕晉遭德威將
兵三萬出飛狐以擊之德威入祁溝關取涿州遂圍守
光于幽州破其外城守光閉門距守而晉軍盡下燕諸
州縣獨幽州不下圍之踰年乃破之以功拜盧龍軍節
度使德威雖爲大將而常身與士卒馳騁于矢石之間
守光驍將單廷珪望見德威于陣曰此周陽五也乃挺
槍馳騎追之德威佯走度廷珪垂及側身少却廷珪馬

方馳不可止縱其少過奮撾擊之廷珪墜馬遂見擒

五代

史八月劉守光僭稱大燕皇帝十二月遣德威率步騎三萬出飛狐與鎮州將王德明定州將陳嚴等軍進討九年正月收涿州降刺史劉知溫五月七日劉守光令驍將單廷珪督精甲萬人出戰德威遇于龍頭岡初廷珪謂左右曰今日擒周陽五旣臨陣見德威廷珪單騎持槍躬追德威垂及德威倒身避之廷珪少退德威奮撾擊墜其馬生獲廷珪賊黨大敗斬首三千級獲大將李山海等五十二人十二日德威自涿州進軍良鄉大城守光旣失廷珪自是奪氣德威之師屢收諸郡降者相繼十年十一月擒守光父子幽州平十二月授德威檢校侍中幽州盧龍等軍節度使德威性忠孝感武皇獎遇嘗思臨難忘身莊宗與劉鄆相持于魏鄆夜潛軍出黃澤關以襲太原德威自幽州以千騎入土門以躡之鄆至樂平遇雨不得進而還德威與鄆俱東爭趨臨清臨清有積粟且晉軍餉道也德威

先馳據之以故莊宗卒能困鄆軍而敗之

五代史十二月汴將劉鄆

自洹水乘虛將寇太原德威在幽州聞之徑以五百騎馳入土門聞鄆軍至樂平不進德威徑至南宮以候汴軍初劉鄆欲據臨清以扼鎮定轉餉之路行次陳宋口德威遣將擒數十人皆傅刃于背熱而遣之旣至謂劉

鄆曰周侍中已據宗城矣德威其夜急騎扼臨清劉

鄆乃入貝州是時德威若不至則勝負未可知也

莊

宗勇而好戰尤銳于見敵德威老將常務持重以挫人

之鋒故其用兵常伺敵之隙以取勝十五年德威將燕

兵三萬人與鎮定等軍從莊宗于河上自麻家渡進軍

臨濮以趨汴州軍宿胡柳陂黎明侯騎報曰梁軍至矣

莊宗問戰于德威德威對曰此去汴州信宿而近梁軍

父母妻子皆在其中而梁人家國繫此一舉吾以深入

之兵當其必死之戰可以計勝而難與力爭也且吾軍先至此糧爨具而營柵完是謂以逸待勞之師也王宜按軍無動而臣請以騎軍擾之使其營柵不得成樵爨不暇給因其勞乏而乘之可以勝也莊宗曰吾軍河上終日俟敵今見敵不擊復何爲乎顧李存審曰公以輜重先吾爲公殿遽督軍而出德威謂其子曰吾不知死所矣前遇梁軍而陣王軍居中鎮定之軍居左德威之軍居右而輜重次右之西兵已接莊宗率銀槍軍馳入梁陣梁軍小敗犯晉輜重輜重見梁朱旗皆驚走入德威軍德威軍亂梁軍乘之德威父子皆戰死莊宗與諸

將相持而哭曰吾不聽老將之言而使其父子至此莊

高祖追封德威燕王子光輔官至刺史

五代史十四年三月契丹寇新

州德威不利退保范陽敵衆攻僅二百日外援未至

德威撫循士衆晝夜乘城竟獲保守十五年我師營麻口

渡將大舉以定汴州德威自幽州率本軍至十二月二

十三日軍次胡柳陂詰且騎報曰汴軍至矣莊宗使問

戰備德威奏曰賊倍道而來未成營壘我營壘已固守

備有餘旣深入賊疆須決萬全之策此去大梁信宿賊

之家屬盡在其間人之常情孰不以家國爲念以我深

入之衆抗彼激憤之軍不以方畧制之恐難必勝王但

按軍保壘臣以騎軍疲之使彼不得下營深晚糧餉不

給進退無據因以乘之破賊之道也莊宗曰河上終日

挑戰恨不遇賊今欵門不戰非壯夫也乃率親軍成列

而出德威不獲已從之謂其子曰吾不知其死所矣莊

宗與汴將王彥章接戰大敗之德威之軍在東偏汴之

遊軍入我輜重衆駭奔入德威軍因紛擾無行列德威

兵少不能解父子俱戰沒先是鎮星犯上將星占者云不利大將是夜收軍德威不至莊宗慟哭謂諸將曰喪我良將吾之咎也德威身長面黑笑不改容凡對敵列陣稟稟然有肅殺之風中興之朝號爲名將及其沒也人皆惜之同光初追贈太師天成中詔與李嗣昭符存審配饗莊宗廟廷晉高祖卽位追封燕王子光輔歷汾州汝州刺史又周光輔太原人後唐著漢馬步總管幽州節度使德威之長子也德威有傳在唐書光輔年甫十歲補幽州中軍兵馬使有成人之志德威以牙軍委之麾下咸取決焉及長體貌魁偉練千戎事父卒授嵐州刺史從莊宗平梁遷檢校尚書左僕射汝州防禦使仍賜協謀定亂功臣天成初移汾州四年入爲右監門衛大將軍長興清泰中歷陳懷磁三郡繼加檢校司徒高祖卽位授蔡州刺史歲餘卒于郡時年三十五贈太史保光輔以功臣子歷數郡皆無濫政竟善終于官雖享年不永亦可嘉也光輔有弟數人光貞歷義乾二州刺史入爲諸衛將軍光遜繼爲蔡州刺史光贊任青州行軍司馬及楊光遠叛滅貶商州司馬會赦徵還尋卒于五代會要故幽州節度使周德威配享莊宗廟長興二年四月勅

符存審字德詳陳州宛邱人也初名存少微賤嘗犯法

當死臨刑指旁壞垣顧主者曰願就死于彼冀得垣土

覆尸主者哀而許之爲徒垣下而主將方飲酒顧其愛

妓思得善歌者佐酒妓言有符存常爲妾歌甚善主將

馳騎召存審而存審以徙垣下故未加刑因徃就召使

歌而悅之存審因得不死其後事李罕之後罕之歸晉

晉王以爲義兒軍使賜姓李氏名存審

五代史符存審字德詳陳州宛

邱人舊名存父楚本州牙將存審少豪俠多智算言兵家事乾符末河南盜起存審鳩率豪右庇捍州里會郡

人李罕之起自羣盜授光州刺史因徃依之中和末罕

之爲蔡寇所逼棄郡投諸葛爽存審從至河陽爲小校屢戰蔡賊有功諸葛爽卒罕之爲其部將所逼出保懷

州部下分散存審乃歸于武皇武皇署右職令典義兒

軍賜姓名存審性謹厚寵遇日隆從晉王擊李匡儔爲前鋒破居庸關

又從擊王行瑜破龍泉寨以功遷檢校左僕射從李嗣昭攻汾州執李瑭遷左右廂步軍都指揮使又從嗣昭攻潞州降丁會從周德威破梁夾城遷忻州刺史蕃漢馬步軍都指揮使晉趙攻燕梁救燕擊趙深州圍祁縣存審與史建瑭軍下博擊走梁軍遷領邢州團練使魏博叛梁降晉存審爲前鋒屯臨清莊宗入魏存審殿軍魏縣與劉鄩相距于莘西從莊宗敗鄩于故元城閻寶以邢州降乃以存審爲安國軍節度使毛璋以滄州降徙存審橫海加洞中書門下平章事五代史自是武皇四征存審常從所

至立功從討，連鏃冒刃死戰，血流盈袖。武皇手自封瘡，日夕臨問。乾寧初，計李匡傳存審前軍，拔居庸關。明年，從討邠州，時邠之勁兵屯龍泉寨，四面懸崖石壁，險固。存審奮力拔之，師旋授檢校左僕射副。李嗣昭討李瑭于邠州，擒之以功改左右廂步軍都指揮使。天祐三年，授蕃漢馬步副指揮使與李嗣昭降。丁會于上黨從周德威破賊于夾城，加檢校司徒，授忻州刺史領蕃漢步都指揮使。七年，檢校太保充蕃漢總管莊宗擊汴人於柏鄉，畱存審守太原。三月，代李存璋戍趙州。九年，梁祖攻脩縣，存審與史建瑭、李嗣肱赴援，屯下博橋。汴人驚亂，燒營而遁。以功遙領邢洺磁團練使。十二年，魏博歸欽于莊宗，遣存審率前鋒據臨清以俟進取。莊宗入魏，存審屯魏縣以抗劉鄆。六月，鄆營莘縣，存審與真定之師營莘西三十里。一日數戰，八月率師攻張源德于貝州。十三年二月，劉鄆自莘悉衆來襲，我魏州存審以大軍踵其後戰于故元城，大敗汴人。從收澶衛磁、洺等州，秋邢州閻寶降。授存審安國軍節度。邢洺磁等州觀察使。十月，戴思遠棄滄州毛璋以城降。授存審檢校太傅。橫海軍節度使兼領魏博馬步都指揮使。明年就加平章事。

契丹圍幽州。是時晉

與梁相持河上欲發兵兵少欲勿救懼失之莊宗疑以

問諸將而存審獨以爲當救曰願假臣騎兵五千足矣

乃遣存審分兵救之卒擊走契丹

五代史十四年八月將兵援周德威于幽

州敗契丹之衆從戰胡柳陂晉兵晨敗亡周德威存審與其子

彥圖力戰暮復敗梁軍于土山遂取德勝築河南北爲

兩城晉人謂之夾寨遷內外蕃漢馬步軍總管

五代史冬被汴

將安彥之于楊勣諸軍進營麻口時梁將謝彥章營行臺

村莊宗勇于接戰每以輕騎當之遇窘者數四存審

每俟其出必叩馬諫曰王將復唐宗社宜爲天下自愛

塞旗挑戰一劍之任無益聖德請責效于臣古人不以

賊遺君父臣雖不武敢不代君之憂莊宗卽時迴駕十二月戰于胡柳晡晚之後存審引所部銀槍効節軍敗

梁軍于土山下是日辰巳間周德威戰歿一軍逗撓梁

軍四集存審與其子彥圖冒刃血戰出沒賊陣與莊宗

軍合午後師復集擊敗汴人十六年春代周德威爲內
外蕃漢馬步總管于德勝口築南北城以據之七月汴
將王瓚自黎陽渡河寇澶州存審拒戰瓚退營于楊村
渡控我上游自是日與交鋒對壘經年大小凡百餘戰
梁朱友謙以河中同州降晉梁遣劉鄆攻同州友謙求
救乃遣存審與李嗣昭救之河中兵少而弱梁人素易
之且不虞晉軍之速至也存審選精騎二百雜河中兵
出擊鄆壘陽敗而走鄆兵追之晉騎反擊獲其騎兵五
十梁人知其晉軍也皆大驚然河中糧少而新降人心
頗持兩端晉軍屯朝邑諸將皆欲速戰存審曰使梁軍
知吾利于速戰則將夾渭而營斷我餉道以持久困我
則我進退不可敗之道也不若緩師示弱伺隙出奇可

以取勝乃按軍不動居旬日望氣者言有黑氣狀如門
雞存審曰可以一戰矣乃進軍擊鄆大敗之鄆閉壘不
復出存審曰鄆兵已敗不如逸之乃休士卒遺裨將王
建及牧馬于沙苑鄆以謂晉軍且懈乃夜遁去存審追
擊于渭河又大敗之五代史十七年汴將劉鄆攻同州
朱友謙求援于我遣存審與李嗣
昭將兵赴之九月次河中進營朝邑時河中久臣于梁
衆持兩端及諸軍大集芻粟畢貴嗣昭懼其翻覆將急
戰以定勝負居旬日梁軍逼我營會望氣者言四方黑
氣如門雞之狀當有戰陣存審曰吾方欲決戰而形于
氣象得非天贊歟是夜閱其衆詰旦進軍梁軍來逆戰
大敗之追斬二千餘級自是梁軍保壘不出存審謂嗣
昭曰吾初懼劉鄆據渭河偏師旣敗彼若退歸懼我踵
之獸窮搏人勿謂無事可開其歸路然後追奔乃令王
建及牧馬于沙苑劉鄆尹皓知之保衆退去遂解同州
之圍存審略地至奉先謁諸帝陵乃班師冊府元龜

十七年七月梁將劉鄆尹皓寇同州先是河中節度使朱友謙以兵收復同州以其子令德主畱務時友謙訖請順友貞請同州節友貞怒其侵已不時與之遂絕友謙請麾節于我因授之友貞乃遣劉鄆與華州節度使尹皓帥師寇同州塹其城友謙力不能救請師于我帝遣蕃漢馬步總管李存審昭義節度使李嗣昭代州刺史王建及帥師赴援九月王師大集于河中朝至夕渡時汴人不意王師速至劉鄆曰蒲人事晉心累貌恭假有乞師寧無猜審至于師行次舍倍道兼程計其行途未能及此李存審聞之笑謂軍吏曰兵法有出奇無窮者兵若自天而墜劉鄆善將何其昧哉汴人素輕蒲兵每遇遊騎挑戰必窮追襲存審初至率精甲千人內選二百處蒲人之間直壓賊壘賊出千人結陣而追之遽見我師大駭而走獲賊騎五十而旋自是賊軍憚戰明日進軍朝邑時蒲中蕩粟暴貴糧餉不給駐軍陝旬人皆思戰李存審欲待圖勝負不時聽從存審謂嗣昭曰我率偏師入寇境蒲中久爲賊有人心尚懷兩端事一差跌則吾屬無類且蒲人羸懦不可驅以爭鋒惟悉我師又衆寡不敵持久則資糧不足求戰則勝負難知每一揣謀令人鬚白公方畧如何嗣昭曰我數千里興兵與

人解門倘無成績則失屬亡師今日良圖無踰急戰存
審曰子所料度非不至此但同州南距渭河又數十里
連接華州若逼動賊軍夾河結壘持久不戰以逸待勞
俟我饋運不充蒲人離貳事生不測吾輩安歸不如示
弱按兵侈其門志觀其進取然後決機軍士口譚未可
取信嗣昭曰善又旬日望氣者言夜見西面黑氣如門
雞之狀必有戰陣存審曰吾方欲決戰而形于氣象得
非天贊我歟召嗣昭友謙聚謀下令軍中誠示所向遲
明進軍距于賊壘賊罄壘而出蒲人在南我師在北騎
軍旣接蒲人小退賊呼曰冀王走矣爲賊所躡嗣昭以
精騎抗之大軍繼逼賊遂奔潰追斬二千級值夜劉鄩
以餘衆保營自是閉壁不出居半月存審謂嗣昭曰予
所料者懼劉鄩據渭結營持久待我今精兵亡敗退走
無門獸窮搏人勿謂無事不如開其走路然後追奔因
令王建及牧馬于沙苑劉鄩知之遂宵遁我師追及渭
河弃鎧投仗相蹈藉所收輜重不可勝數劉鄩尹皓單
騎獲張文禮弑趙王王鎔晉遣閻寶李嗣昭等攻之至
免輒戰死最後遺存審破之五代史十八年王師討張文

次戰歿十九年遣存審帥師進攻叛帥于城下文禮之將李再豐陰送款于存審我師中夜登城擒之子處球等露布以獻鎮州平以功加檢校太傅兼侍中二十年正月師旋于魏州莊宗出城迎勞就第宴樂存審爲將有機畧大小百餘戰未嘗敗衄與周德威齊名德威死晉之舊將獨存審在契丹攻遮虜乃以存審爲盧龍軍節度使時存審已病辭不肯行莊宗使人慰諭強遣之莊宗滅梁入洛存審自以身爲大將不得與破梁之功怏怏疾益甚因請朝京師是時郭崇韜權位已重然其名望素出存審下不樂其來而加己上因沮其事存審妻郭氏泣訴于崇韜曰吾夫于國有功而與公鄉里之舊奈何忍令死弃窮野崇韜愈怒存審竟累上

輒不許存審伏枕嘆曰老夫事二主四十年今日天下一家四夷遠俗至于亡國之將射鈎斬祛之人皆得親見天子奉觴爲壽而獨子弃死于此豈非命哉崇韜度存審病已亟乃請許其來朝徙存審宣武軍節度使卒于幽州臨終戒其子曰吾少提一劖去鄉里四十年間取將相然履鋒冒刃出死入生而得至此也因出其平生身所中矢鏃百餘而示之曰爾其勉哉

五代史無何契丹犯燕薊

郭崇韜奏日汴寇未平繼韜背叛北邊捍禦非存審不可上遣中使諭之存審卧病羸瘠附奏曰臣幼忠稟命靡敢爲辭但疴恙纏綿未堪祗役旣而詔存審以本官充幽州盧龍節度使自鎮州之任同光初加開府儀同三司檢校太師中書令食邑千戶賜號忠烈扶天啟運功臣十月平梁遷都洛陽存審以身爲大將不得預收

復中原之功舊疾愈作堅求入觀尋醫以情告郭崇韜時崇韜自負一時佐命之功無出己右功名事望素在存審之下權勢既隆人士輒湊不欲存審加于己上每有章奏求覲卽陰沮之存審妻郭氏泣訴于崇韜曰吾夫于國粗効馳驅與公鄉里舊公忍令死棄北荒何無情之如是崇韜益慚懾明年春疾甚上章懇切乞生觀天顏不許存審伏枕而嘆曰老夫厯事二主垂四十年幸而遇今日天下一家遠夷極塞皆得而觀形墀射鈞斬祛之人孰不奉觴丹陛獨子塞隔豈非命哉漸增危篤崇韜奏請許存審入觀四月制授存審宣武軍節度使諸道蕃漢馬步總管詔未至五月十五日卒于幽州官舍時年六十三遺命葬太原存審遺奏陳叙不得面覲詞旨悽惋莊宗震悼久之廢朝三日贈尚書令存審少在軍中識機知變行軍出師法令嚴明決策制勝從無遺悔功名與周德威相匹皆近代之良也常戒諸子曰子本寒家少小撫一幼而違鄉里四十年間位極將相其間屯危患難屢冒及入萬死而無一生身方及此前後矢僅百餘乃出倅以示諸子因以奢侈爲戒存審徵時嘗爲俘囚將就戮于郊外臨刑指危垣謂主者曰請就戮于此下冀得壞垣覆尸旅魂之幸也主者

哀之爲移次焉遷延之際主將擁妓而飲思得歌者以
助歡妓曰俘囚有符存審者妾之舊識每令擊節以贊
歌令主將欣然馳騎而捨之豈非命也五代會要故
陝州節度使符存審配享莊宗廟長興二年四月勅
存審三子彥超彥饒彥卿玉堂閒話契丹犯闕之初所
在羣盜蜂起戎人患之陳州
有一婦人爲賊帥號曰白項鴉年可四十許形質粗短
髮黃體黑來詣戎王襲男子姓名衣巾拜跪皆爲男子
狀戎王召見賜錦袍銀帶鞍馬署爲懷化將軍委之招
輯山東諸盜賜與甚厚僞燕王趙延壽召問之婦人自
云能左右馳射被雙鞬日可行二百里盤弓擊劍皆所
善也其屬數千男子皆役服之人問有夫否云前後有
夫數十人少不如意皆手刃之矣聞者莫不嗟憤旬日
在都下乘馬出入又有一男子亦乘馬從之此人妖也
此戎亂中夏婦人稱雄皆陰盛之應婦人後爲兗州節
度使符彥卿戮之青瑣高議大丞相李公昉嘗言當
日目外鎮麤官符彥卿知汴州有詩云全軍十萬擁雄
師正是酬恩報國時汴水波濤喧鼓角隋堤楊柳拂旌
旗前驅紅旆關西將環坐青娥趙國姬爲報長安冠
蓋道簾官到底是男兒公之詩意蓋有憾之詞爾

超爲汾州刺史郭從謙弑莊宗明宗入洛陽是時彥超爲北京巡檢永王存霸奔于太原彥超見畱守張憲謀之憲儒者事莊宗最久不忍背恩欲納之彥超不從存霸遂見殺明宗卽位彥超來朝明宗德之勞曰河東無事賴爾之力也以爲建雄軍畱後遷北京畱守徙鎮昭義罷爲上將軍復爲泰寧軍節度使又徙安遠彥超主藏奴王希全盜其資彥超稍責之奴懼夜叩其門言有急彥超出見殺贈太尉

五代史彥超存審之長子也少事武皇累厯牙職存審卒莊宗

以彥超爲汾州刺史同光末魏州軍亂詔彥超赴北京巡檢先是朝廷令內官呂鄭二人在太原一監兵一監倉庫及明宗入洛皇弟存霸單騎奔河東與呂鄭謀殺彥超與畱守張憲彥超覺之密與憲謀未決部下大譟

州兵畢集張憲出奔是夕軍士殺呂鄭存霸于衙城詰旦聞洛陽禍變彥超告諭三軍明宗又令其弟龍武都虞候彥卿馳騎安撫六月彥超入觀明宗召見撫諭尋授晉州留後未行會其弟前曹州刺史彥饒平宣武亂軍明宗喜召彥超謂之曰吾得爾兄弟力餘更何憂爾爲我往河東撫育耆舊卽授北京留守太原尹明年冬移授昭義節度使四年授驍衛上將軍改金吾上將軍長興元年授泰寧軍節度使尋移鎮安州彥超廝養中有王希全者小字佛畱粗知書計委主貨財歲久耗失甚多彥超止于訶謔而已應順元年正月佛畱聞朝廷多事因與任貨兒等謀亂一夕扣門言朝廷有急遞至彥超出至聽事佛畱挾刃害之詰旦本州節度副使李端召州兵攻佛畱等殺之餘衆奔淮南擒彥超部將趙溫等二十六人誅之彥超贈太尉存審次子彥饒晉史有傳次彥卿皇朝前鳳翔節度使守太師中書令封魏王今居于洛陽次彥能終子楚州防禦使次彥琳仕皇朝爲金吾上將軍卒於任次子彥饒爲汴州馬步軍都指揮使天成元年發汴兵三千戍瓦橋關控鶴指揮使張諫爲亂殺

權知州高逖迫彥饒爲帥彥饒陽許之日欲吾爲帥當止焚掠明日以軍禮見吾于南衙乃陰與拱衙指揮使龐起伏甲于衙內明日諫等皆集伏兵發誅諫等殺四百餘人卽日牒州事與推官韋儼明宗下詔褒其忠略其後累遷彭聖都指揮使歷曹沂饒三州刺史清泰三年自饒州刺史拜忠正軍節度使侍衛馬步軍都指揮使晉高祖起太原彥饒以侍衛兵從廢帝至河陽廢帝敗晉高祖以楊光遠代彥饒將親軍徙彥饒義成軍節度使五代史符彥饒唐莊宗創蕃漢總管存審之第二子也存審唐書有傳彥饒少驍勇能騎射唐天祐十五年冬莊宗與梁大戰于胡柳陂彥饒與弟彥圖俱從其父血戰有功莊宗壯之因用爲騎將同光中以功

授曹州刺史明宗卽位改刺沂州天成中屯守梁園會
起軍北戍塞下時有偏校以宣武之帥迫彥饒爲之彥
饒給許其請明日殺爲惡者奏之時人嘉其方畧長興
中爲金州防禦使爲政甚有民譽其後累遷節鎮天福
初爲滑州節度使累官至檢校太傅范延光反白奉進以侍衛兵三千屯
滑州兵士犯法奉進捕得五人其三人義成兵也因并
斬之彥饒怒明日奉進從數騎過彥饒謝不先告而殺
彥饒曰軍士各有部分義成兵卒豈公所得斬邪何無
主客之禮也奉進怒曰軍士犯法安有彼此且僕已自
謝過而公怒不息欲與延光同反耶拂衣而起彥饒不
復畱之其麾下大譟追奉進殺之彥饒不之止也已而
屯駐軍將馬萬等聞亂以兵擒彥饒送之京師遂以彥

饒應延光反間行至赤岡高祖使人殺之下詔削奪在身官爵彥饒與晉初無釁隙以一旦之忿不能馭其軍

殺奉進已非其本意以反見誅非其罪也

五代史二年七月范延光

據郭都叛朝廷遣侍衛馬軍都指揮使白奉進率騎軍三千屯于州之開元寺一日彥饒與奉進因事忿爭于牙署事具奉進傳中是時奉進厲聲曰爾莫是與范延光同反耶拂衣而起彥饒不留帳下介士大譟擒奉進殺之奉進從騎散走傳呼于外時步軍都校馬萬次拔盧順密聞奉進被害卽率其部衆攻滑之子城執彥饒以出遣裨將方太拘送闕下行及赤岡南高祖遣中使害于路左又白奉進字德昇雲州清塞軍人也父曰達子世居朔野以弋獵爲事奉進少善騎射後唐武皇鎮太原奉進謁于軍門以求自効武皇納于麾下莊宗之破夾寨也奉進挺身首犯賊鋒莊宗覩而壯之後從戰山東河上繼以功遷龍武指揮使同光中魏王繼岌伐蜀擢爲親軍指揮使天成長興中統上軍加檢校右散騎常侍應順中轉捧聖右廂都指揮使檢校刑部尚

書賜忠順保義功臣遙領封州刺史清泰中加檢校右
僕射唐州刺史治郡踰年甚有政績高祖卽位徵赴闕
超加檢校司徒充護聖左廂都指揮使遙領歙州刺史
始奉進有女嫁于皇子重信故高祖尤所倚愛二年改
護聖左右廂都指揮使是歲車駕幸夷門五月領昭信
軍節度充侍衛馬軍都指揮使六月范延光據鄆爲亂
詔遣率騎軍三千北屯滑臺時符彥饒爲滑州節度使
一夕有軍士夜掠居人奉進捕之凡獲五盜三在奉進
本軍二在彥饒麾下尋命俱斬之彥饒怒其不先告深
銜之明日奉進左右勸奉進面謝奉進然之以從騎數
人候彥饒于牙城旣入且述其過彥饒曰軍中法令各
有部分何得將滑州兵士一例處斬殊無主客之義乎
奉進曰軍士抵法寧有彼我今僕以咎自陳而公怒不
息莫是與范延光同反耶因拂衣而起彥饒不畱其帳
下介士大譖擒奉進殺之是日步軍都校馬萬次校盧
順密間奉進遇害率其部衆攻滑之子城執彥饒送于
京師戮于班荆館北高祖以奉進

史建塘鴈門人也晉王爲鴈門節度使其父敬思爲九

府都督從晉王入關破黃巢復京師擊秦宗權于陳州

常將騎兵爲先鋒

五代史史建瑭字國寶父敬思鴈門人仕郡至牙校武皇節制鴈門敬思爲九府都督從入關定

京師及鎮太原爲裨將晉王東追黃巢于冤朐還過梁

軍其城北梁王置酒上源驛

五代史纂誤今按本紀李克用追討黃巢于冤句而

還是時卽中和四年甲辰歲也至光啟二年丙午歲朱全忠始封沛郡王天復元年辛酉歲始封梁王當中和

四年克用追黃巢還過梁時朱全忠未封梁王也

獨敬思與薛鐵山賀回鶻等

十餘人侍晉王醉畱宿梁驛梁兵夜圍而攻之敬思登

驛樓射殺梁兵十餘人會天大雨晉王得與從者俱去

縕尉氏門以出而敬思爲梁追兵所得見殺

五代史中和四年從

援陳許爲前鋒敗黃巢于汴上追賊至徐充常將騎挺身酣戰勇冠諸軍是時天下之師雲集軍中無不推伏

六月衛從武皇入汴州舍于上源是夕爲汴人所攻
敬思方大醉因蹶然而興操弓與汴人鬥矢不虛發汴
人死者數百夜分冒雨方達汴橋左右扶武皇決圍而
去敬思後拒血戰而歿武皇還營知失敬思流涕久之

建塘少事軍中爲裨校自晉降丁會與梁相拒于潞州

建塘已爲晉兵先鋒梁兵數爲建塘所殺相戒當避史

先鋒梁遣王景仁攻趙晉軍救趙建塘以先鋒兵出井

陘戰于柏鄉梁軍爲方陣分其兵爲二汴宋之軍居左

魏滑之軍居右周德威擊其左建塘擊其右梁軍皆走

遂大敗之以功加檢校左僕射

五代史建塘以父廢少
仕軍門光化中典昭德

軍與李嗣昭攻汾州卒先登城擒叛將李瑭以獻授檢
校工部尚書李思安之園上黨也建塘爲前鋒與總管
周德威赴援時汴人夾城深固援路斷絕建塘日引精
兵設伏擒生夜犯汴營驅斬于計敵人不敢芻牧汴將

王景仁營于柏鄉建塘與周德威先出井陘高邑之戰
日已晡晚汴軍有歸志建塘督部落精騎先陷其陣夾
攻魏滑之間遂長驅追擊夜入柏鄉俘斬數千計論功
加檢校左僕射師還畱戍趙州汴將氏延賞數犯趙之
鄉獲延賞獻之

天祐九年晉攻燕燕王劉守光乞師

于梁梁太祖自將擊趙圍棗彊脩縣是時晉精兵皆北
攻燕獨符存審與建塘以三千騎屯趙州梁軍已破棗
彊存審扼下博橋建塘分其麾下五百騎爲五隊一之
衡水一之南宮一之信都一之阜城而自將其一約各
取梁芻牧者十人會下博至暮擒梁兵數十皆殺之各
留其一人縱使逸去告之曰晉王軍且大至明日建塘
率百騎爲梁旗幟雜其芻牧者暮叩梁營殺其守門卒

縱火大呼斬擊數十百人而梁芻牧者所出各遇晉兵有所亡失其縱而不殺者歸而皆言晉軍且至梁太祖夜拔營去修縣人追擊之梁軍棄其輜重鎧甲不可勝

計染太祖方病由是增劇而晉軍以故得并力以收燕

者二人之力也

五代史九年梁祖親攻修縣時王師併攻幽州聲言汴軍五十萬將寇鎮定都

將符存審謂建瑭曰梁軍倘以五十萬來我等何以待之裨將趙行實曰走入土門爲上策存審曰事未可知但老賊在東別將西來尚可徐圖不旬日楊師厚圍襄彊賀德倫圍修縣染祖自至攻城甚急存審曰吾王方事此面南鄙之事付我等數人今西道無兵坐滋賊勢何以爲謀老賊若不下修阜必西攻深冀與公等料閱騎軍偵視賊勢乃選精騎入百趨信都存審扼下博橋建塘與李嗣肱分道擒生建瑭乃分麾下三百騎爲五軍自將一軍深入各命俘掠梁軍之芻牧者還會下博橋翌日諸軍皆至獲芻牧者數百人聚而殺之緩數十

人令其逸去各日沙陀軍大至矣梁軍震恐明日建塘
觸肱爲梁軍服色與芻牧者相雜晡晚及賀德倫寨門
殺守門者縱火大譖佯斬而去是夜梁祖燒營而遁比
至貝州迷失道路委弃兵仗不可勝計冊府元龜符
存審爲蕃漢馬步都指麾使天祐九年莊宗討劉守光
于幽州梁太祖因此北伐至于棗彊存審以騎軍二千
作何禦之行實日誠如是走入土門爲上策存審曰賊
軍未至難便從公之上策但得老賊在東別將西來尚
可從容畫策不旬日楊師厚攻棗彊賀德倫寇薺縣攻
城甚急存審謂趙行實史建瑭曰吾王方事北面南鄙
之事付我等數人今西道無兵修縣危急我等坐觀其
弊何以自安老賊旣下薺城必西寇深冀不預爲方畧
則滋蔓難圖與公等輕騎而行偵其所向乃選精騎入
百急趨信都扼下博橋道存審令史建瑭李都督分道
擒生建瑭分麾下五百騎爲五軍一軍之衡水一軍之
南宮一軍之信都一軍之阜城自將一軍深入各命存
賊討芻糧者十人而會于下博橋翌日諸軍所至皆獲
芻蕘者數百聚而殺之內緩繁一人令其逸去或教

其去者云可以報朱公彞爾戰地礪戈矛晉王大軍至矣諸軍逸去者皆欲以是言賊間大駭李都督史建瑭各領百餘騎爲賊旗幟服色與芻糧者相雜而行至暮及賀德倫營門殺門者縱火大呼俘斬而旋其芻蕘者斷手臂得歸皆言我兵大至朱溫大駭遂命夜遁趨于貝郡移人持鉏耰白徒追擊汴軍收其幡車鎧仗不可勝計朱溫先氣瘤發動因是愈甚畱貝州旬日不能乘肩輿疾作暴怒其將張正言許從實朱彥柔皆斬于軍門以其亡後從莊宗入魏博敗劉鄩于故元城累以師移縣故也

功歷貝相二州刺史十八年晉軍討張文禮于鎮州建瑭以先鋒兵下趙州執其刺史王鋌兵傅鎮州建瑭攻其城門中流矢卒年四十二

五代史十二年魏博歸欽縣十三年敗劉鄩于元城收澶州以建瑭爲刺史檢校司空外衛騎軍都將尋歷貝相二州刺史屯于德勝十八年與閻寶討張文禮爲馬軍都將八月收趙州獲刺史王鋌進逼鎮州爲流矢所中卒于軍時年四十六

建塘子匡翰尚晉高祖女是爲魯國長公主匡翰爲將
沈毅有謀而接下以禮與部曲語未嘗不名厯天雄軍
步軍都指揮使彰聖馬軍都指揮使事晉爲懷和二州
刺史鄭州防禦使義成軍節度使所至兵民稱慕之史
氏世爲將而匡翰好讀書尤喜春秋三傳與學者講論
終日無倦義成軍從事關徹尤嗜酒嘗醉罵匡翰曰近
聞張彥澤鬢張式未見史匡翰斬關徹天下談者未有
偶耳匡翰不怒引滿自罰而慰勉之人皆服其量卒年

四十五代史史匡翰字元輔雁門人也父建塘事莊宗
有傳匡翰起家襲九府都督厯代州遼州副使檢校太子賓客同光初爲嵐憲朔等州都遊奕使改天雄軍牢
爲先鋒將敵人畏之謂之史先鋒累立戰功唐書

城都指揮使再加檢校戶部尚書領滑州刺史天成中授天雄軍步軍都指揮使歲餘遷侍衛彭聖馬軍都指揮使高祖有天下也授檢校司空懷州刺史其妻魯國長公主卽高祖之妹也尋轉控鶴都指揮使兼和州刺史駙馬都尉俄授檢校司徒鄭州防禦使未幾遷義成軍節度滑濮等州觀察處置管內河隄等使丁母憂尋起復本鎮匡翰剛毅有謀畧御軍嚴整接下以禮與部曲語未嘗稱名厯數郡皆有政聲尤好春秋左氏傳每視政之暇延學者講說躬自執卷受業焉時發難問窮于隱與流輩或戲爲史三傳旣自端謹不喜人醉幕客有闕徹者狂率酣鬪管一日使酒怒目謂匡翰曰明公昔刺覃襄與徹主客道至事無不可今領節鉞數不扣容且書記趙彌陘詖之人也脅肩詔笑贖貨無厭而明公待之甚厚徹今請死近聞張彥澤縫張式未聞匡翰斬關徹恐天下談者未有比類匡翰不怒引滿自罰而慰勉之其寃厚如此天福六年白馬河決匡翰祭之見一十大有角浮于水心甚惡之後數月遘疾而卒于鎮年四十五詔贈太保子彥容厯官苑使濮單宿三州刺史功臣義成軍節度滑濮等州觀察處置管內河隄等使起復冠軍大將軍右

金吾衛大將軍員外置同正員檢校司徒兼御史大夫

駙馬都尉上

碑銘

并序朝議郎尚書虞部員外郎知

太保史公神道碑

制誥臣陶穀奉勅撰待詔散大夫太府卿賜紫金魚

元輔蜀

望帝之洪苗

袋臣閭光遠奉勅書

官周崇江漢之祠已

楚倚相之厥允迨于戰國世爲史

封令望不衰奇才間出

疏王爵漢重張金之族遂寵侯

大勳不可以中微歟

長江激浪下端家以方舟寶劍騰晶發

積者數世事詳圖謀功備鼎彝大王父諱懷清皇任安

土者所宜于有後享富貴者累朝

大勳不可以中微歟茅

九府都督王父諱敬思皇任安慶九府都督顯考

諱史兼九府都督贈太保公卽太保長

慶九府都督王室漫

赴陸之龍蛇覩門一生

子也分太白之精稟峒山之英笑腐儒之老一經拜神

殊而學五兵懷鼓篋之心行有餘力蘊飛箱之辨似不

能言天祐中王室漫

赴陸之龍蛇覩門一生

郊之畧誓金壇百勝之師戰于兩河決平多壘以公人

才地望宜副頒條起家遷代州副使以勞

加銀青光祿大夫檢核太子賓客兼監察御史改遼州

副使兼領九府都督同光初莊皇受命梁祚告終馳驂

門於夷陵熒惑入于南斗負橫戈而猛士守方未安四鄙將寧邊徼特委警巡以九府都督充嵐憲朔等州都遊奕使解職授天雄軍牢城都指揮使遷檢校刑部尚書兼御史大夫上柱戶部尚書潯州刺史未幾改天雄軍步軍都指揮使刺史如故明年遷侍衛彭聖馬軍都指揮使兼九府都督恩逮降時讓爲輕遙領百城仍兼九府轉檢校下也入大定萬國來朝將竇憲于騎軍已平敵國牧冠恂于河內俾惠一方授檢校司空懷州刺史政成轉控鶴都指揮使加金紫階兼和州刺史駙馬都尉虎賚三百清禁圃田待理漢殿掄材功臣旌佐國之名出牧奉專城之寄渤海守布解繩之政化洽下車淮陰侯有授鐵錠之才宜膺推轂謀于良帥屬在舊勳揚之勢軾前熊伏寧淹豹變之期齋壇峻而金鼓嚴麻案宣而油幢出漢壘接平陽之第禹河連沁水之封控梁苑之西郊殷乎威望撫國僑之遺俗綽有政聲當四禦俄迫內艱居喪爰疚於塊苦有司不避于兵革大君有命難違蘇上之恩開國承家遂奉墨縗之制授起復

冠軍

吾衛大將軍員外置同正員依前充

節度使列旌旂于衛幕再分

泣風雨於梁山難勝

永慕海運方遠峯摧若而猶思擇帥三陽莫辨

處問迴生之草管輅慊與才之嘆仲尼興有命之言名

不遂而功不成生何足貴令其終而善其始歿且奚寃

以天福七年三月十六日寢疾薨于鎮享年四十一人罷市年光似箭訝天道于張弓日遙高春

時情於相杵有詔贈太保喪葬之儀並從加等越明年

太原太歲在癸卯孟夏四月二十有三日庚午歸葬于北京也銘旌前導鹵薄分行何須陶氏牛

眠方爲吉地不待膝公馬立自得佳城載惟積慶之家須及莫京之嗣尚魯國大長公主車服有容實殷帝之

歸妹穠華之王姬半枯旋歎于未亡一慟

俄聞於晝哭風飄賓匣翻成別鶴之悲塵暗粧臺永結離鶯之恨嗣子四人長曰彥容宮苑使湊州刺史次曰

彥澄彥琪並西頭供奉官幼州別駕以于公之陰鴈門合容車以鄧氏之舊親家宜藏策寵旣隆于奕世榮豈讓于重侯近朝以來莫之比也嘻以公之忠肅恭懿宣慈惠和求福固向見義有勇秉

達招延無間於後生不積財而但務藏書不憂家而
惟思報國求諸時彥我無愧焉宜乎享大年躋極品上
擊九萬里直聳一千尋而陽報無徵天賦有限極公侯
子男而無成守溫良恭儉讓之言得
以謂歿而不朽將傳來裔期播徽音合從魯國之襄方
盡延陵之美臣才非地職在仰
聞家之德虔遵睿旨強綏斯文屬辭而徒聲渝
揚歎事而多慙漏鞠躬抒思再拜銘勳將招岱岳之功
魂輒效楚詞之意銘曰
信而誠藏策書于周府征穀于漢營年旣謝兮時正
來河方誓兮山告頽訝陰隲而已矣歎陽報而哀哉
帝鄉丹旐悠悠兮下山陽隔兩鄉之明月
陟千里之宏崗龜告吉兮蓍言歲年惟利兮日其良榮
蔓草于原上揭豐碑于路旁鶴且白兮
來翔傳千秋兮萬代播蘭杜之芬芳天福八年歲次癸
卯六月丁未朔十四日建五代史史懿字繼美
爲先鋒都校唐書有傳莊宗之伐鎮陽時建瑭爲流矢
所中而卒懿時年甫弱冠莊宗以其父歿于王事召拜
昭德軍使俄遷先鋒左右廂都校俾嗣其家聲天成中

爲涿州刺史。晉初由趙州刺史遷洛州團練使尋歷亳鳳二州防禦使。晉祖以其弟翰尚魯國長公主故尤所注意。天福中授彰武軍節度觀察副使。後開運初厯澶貝二鎮節度使。三年移鎮涇原。未幾契丹入中原時四方征鎮爲戎王所召者靡不麏至。唯懿堅壁拒命仍送款于漢祖。漢有天下就拜檢校太尉同平章事及賜功臣名號廣順初加檢校太師兼侍中進封邠國公顯德元年春以抱病歸朝途經洛卒于其第年六十二贈中書令。

冊府元龜周史懿字繼美爲涇原節度使本名犯太祖廟諱故改焉

王建及許州人也。少事李罕之。從罕之奔晉爲匡衛指揮使。

五代史李建及許州人本姓王父質建及少事李罕之爲紀綱光啟中罕之謁武皇于晉陽因選部下驍勇者百人以獻建及在籍中後以功署牙職典義兒軍及賜姓名。天祐七年改匡衛軍都校。

梁晉

戰柏鄉相拒鄗邑野河上。鎮定兵扼河橋。梁兵急擊之。莊宗登高望見。鎮定兵將敗。顧建及曰：「橋爲梁奪。則吾

軍危矣奈何建及選二百人馳擊梁兵梁兵敗解去

五代

史柏鄉之役汴將韓勍追周德威至高邑南野河上鎮定兵將翊橋道韓勍選精兵先奪之莊宗登高而望鎮定建及于部選士二百挺槍大譖禦汴軍却之于橋下從

戰莘野故元城皆先登陷陣以功累拜遼州刺史將銀
槍効節軍晉攻楊劉建及躬自負葭葦埋塹先登拔之
從戰胡柳晉兵已敗與梁爭土山梁兵先至登山而陣
莊宗至山下望梁陣堅而整呼其軍曰今日之戰得山
者勝因馳騎犯之建及以銀槍軍繼進梁兵下走陣山
西晉兵遂得土山諸將皆言潰兵未集且暮不可戰閻
寶曰彼陣山上吾在其下尚能擊之況以高而擊下不

可失也建及以爲然因白莊宗曰請登高望臣破敵卽呼其衆曰今日所失輜重皆在山西盍往取之卽馳犯梁陣梁兵大敗五代史二月王師攻魏魏人夜出犯我營建及設伏待之扼其歸路盡殪之劉鄩亂建及率銀槍勁兵千人赴之擊敗汴軍追奔至其壘元城之戰建及首陷其陣授天雄軍教練使八月遷遼州刺史十四年從擊契丹于幽州破之十二月從攻楊劉自寅至午汴軍嬰城拒守建及自負葭葦堙塹率先登梯遂拔之胡柳之役前軍逗撓際晚汴軍登土山建及一戰奪之莊宗欲收軍詰朝合戰建及橫稍當前日賊大將已亡乘此易擊王但登山觀臣破賊卽引銀槍効節大呼奮擊三軍增氣由是王師復振以功授檢校司空魏博內外衙都將晉遂軍德勝爲南北城于河上梁將賀瓌攻其南城以竹笮維戰艦于河晉兵不得渡南城危甚莊宗積金帛于軍門募能

破梁戰艦者至于吐火禁咒莫不皆有建及重鎧執稍

呼曰梁晉一水間耳何必巧爲吾今破之矣卽以大瓮

積薪自上流縱火焚梁艦建及以二舟載甲士隨之斧

其竹笮梁兵皆走晉軍乃得渡救南城環圍解去五代史十

六年汴將賀瓌攻德勝南城以戰船十餘艘竹笮維之扼斷津路王師不得渡城中矢石將盡守城將氏延賞

危急莊宗令積帛軍門召能破賊船者津人有馬破龍

者能水游乃令往見延賞延賞言危窘極矣所爭晷刻

時掉船滿河流矢雨集建及被重鎧執稍呼曰豈有一

衣帶水縱賊如此乃以二船實甲士皆短兵持斧徑抵

梁之戰艦斧其笮又令上流具甕積薪其上順流縱火以攻其艦須臾烟焰騰城梁軍斷纜而遁建及乃入南

城賀瓌解軍去冊府元龜王建及爲衙軍都校天祐七年王師攻魏州魏人夜出犯吾營建及設伏待之扼其歸路盡殪之汴將劉鄆之營莘縣月餘不出忽一旦出急兵攻鎮定之營軍中騰亂建及率銀槍勁兵千人

赴之擊敗汴軍進奔至其壘十七年梁軍圍德勝城百道齊攻又以蒙衝戰艦斷其津渡莊宗陣于北岸津路不通守將延賞矢石將盡莊宗積錢帛于軍門募能破賊船者于是獻伎者數十或言能吐火焚舟或言能遊水破艦或言能禁咒兵及悉命試之卒無成功城中危急所爭晷漏虎臣不能勇智士不能謀莊宗形于憂色建及擐甲而進日賊帥傾巢昧死冀茲一舉如我師不南則彼爲得計今豈可限一衣帶而縱敵憂君今日勝負臣當効命遂以巨索聯舟十艘選効節勇卒三百人持斧被鎧鼓枹而行中流擊之賊樓船三層處蒙以牛革縣板如睥睨之制我船將近流矢雨集建及率持斧者入蒙衝間斬其竹纜破賊懸楯以矟刺之因于上流取甕數百以木夾口竹笮維之又以巨索牽制積芻薪于其上灌脂沃膏火發亘天別維巨艦中實甲士乘烟鼓譟賊斷繼而下沉溺者大半我軍由是得渡帝曰周瑜得黃蓋而挫曹公吾有建及卒破賊艦奇才猛將何代自莊宗得魏博建及將銀槍効節軍建及爲將喜以家資散士卒莊宗遣宦官韋令圖監其軍令圖言建

及得士心懼有異志不可令典牙兵卽以爲代州刺史

建及快快而卒年五十七

五代史其年十二月與汴將王瓚戰于威城建及傷手莊

宗解御衣金帶賜之建及有膽氣慷慨不羣臨陣鞠旅意氣橫壯自莊宗至魏州建及都總內外衙銀鎗効節

帳前親軍善于撫御所得賞賜皆分給部下絕甘分少頗洽軍情又累立戰功雄勇冠絕雖劣者忌讒之時宦

官韋令圓監建及軍每于莊宗前言建及以家財驟施其趣向志意不小不可令典衙兵莊宗因猜之建及性

既忠盡雖知讒構不改其操十七年三月授代州刺史

八月與李存審赴河中解同州之圍建及少遇禍亂久從戰陣矢石所中肌無完膚後有功見疑

私心憤鬱是歲卒于太原時年五十七

元行欽幽州人也爲劉守光裨將守光篡其父仁恭使

行欽以兵攻仁恭于大安山而囚之又使行欽害諸兄弟其後晉攻幽州守光使行欽募兵雲朔間是時明宗

掠地山北與行欽相拒廣邊軍凡八戰明宗七射中行
欽行欽拔矢而戰亦射明宗中股行欽屢敗乃降明宗
撫其背而飲以酒曰壯士也因養以爲子常從明宗戰
數立功五代史元行欽本幽州劉守光之愛將守光之
奪父位也令行欽攻大恩山又令殺諸兄弟天祐九年周德威攻圍幽州守光因讒令行欽于山北募
兵以應契丹時明宗爲將攻行欽于山北與之接戰矢及明宗馬鞍旣而以勢迫來降明宗憐其有勇奏隸爲
假子因從征討恩禮特隆常臨敵擒生必有所獲名聞
軍中通鑑考異周太祖實錄云李嗣源與高行珪追蹤至廣邊軍元行欽帥騎拒戰行珪呼謂行欽曰與公俱事劉家我爲劉家守城爾則僥稱畱後誰之過也今日之事何勞士衆與君抗衡以決勝負行欽驍猛騎射絕衆報曰可行周馬足微蹶將踣嗣源躍馬救之頓擊行欽幾墜行欽正身引弓射嗣源中髀貫鞍嗣源拔矢凡八戰控弦七發矢中行欽猶沫血酣戰不解是夜行欽窮蹙固守廣邊軍晉兵圍之嗣源遣人告之曰彼此

戰將不假言諭事勢可量亟來相見必保功名望日行欽面縛出降嗣源酌酒欽之撫其背曰吾子壯士也養爲假子臨敵擒生必有所獲名聞軍中

莊宗已下魏益選驍將自衛聞行

欽趨勇取之以爲散員都部署賜姓名曰李紹榮

元龜冊府

元行欽初從明宗名聞軍中爲散員都部署賜姓名紹榮莊宗好戰而輕敵與梁軍

戰潘張軍敗而潰莊宗得三四騎馳去梁兵數百追及

攢稍圍之行欽望其旗而識之馳一騎奮劍斷其二矛

斬首一級梁兵解去莊宗還營持行欽泣曰富貴與卿

共之由是寵絕諸將拜忻州刺史遷武寧軍節度使

五代

史莊宗東定趙魏選號健置之麾下因索行欽明宗不得已而遣之時有散指揮都頭名爲散員命行欽爲都部署賜姓名紹榮莊宗好戰勇于大敵或臨陣有急兵行欽必擗身解門翼衛之莊宗之營于德勝也與汴軍

戰于潘張王師不利諸軍奔亂莊宗得三四騎而旋中野爲汴軍數百騎攢稍攻之事將不測行欽識其懼急馳一騎奮劍斷二矛斬一級汴軍乃解圍翼莊宗還宮莊宗因流涕言曰富貴與卿共之自是寵冠諸將官至檢校太傅忻州刺史及莊宗平梁授武寧軍節度使莊宗宴羣臣于內殿酒酣樂作道平生戰陣事以爲笑樂而怪行欽不在因左右顧視曰紹榮安在所司奏曰奉勅宴使相紹榮散官不得與也莊宗罷會不樂明日卽拜行欽同中書門下平章事自此不召羣臣入內殿但宴武臣而已五代史常因相預會行欽官爲保傅當地尋下坐酒酣樂作莊宗叙述平生戰陣之事因左右顧視曰紹榮安在所司奏云有敕使相預會紹榮散官殿上無位莊宗微會不懼翌日以行欽爲同平章事由是不宴百官于內殿但宴武臣而已三年行欽喪婦莊宗有所愛官人生皇子者劉皇后心忌之會行欽入侍莊宗勞之曰紹榮喪婦復娶耶

吾給爾婚財皇后指所忌宮人謂莊宗曰皇帝憐紹榮
可使爲婦莊宗難違所請徵許之皇后卽命紹榮謝之
未退肩輿已出莊宗心不懌佯不豫者累日業已遣去無如之何

趙在禮反于魏莊宗

方選大將擊之劉皇后曰此小事可趣紹榮指揮乃以行欽爲鄴都行營招撫使將二千人討之行欽攻鄴南門以詔書招在禮在禮送羊酒犒軍登城謂行欽曰將士經年離去父母不取勅旨奔歸上貽聖憂追悔何及若公善爲之辭尚能改過自新行欽曰天子以汝等有社稷之功小過必當赦宥在禮再拜以詔書示諸軍皇甫暉從旁奪詔書壞之軍士大譟行欽具以聞莊宗大怒敕行欽破城之日無遺種乃益召諸鎮兵皆屬行欽

行欽屯澶州分諸鎮兵爲五道毀民車輪門扉屋椽爲
筏渡長慶河攻冠氏門不克是時邢洺諸州相繼皆叛
而行欽攻鄆無功莊宗欲自將以往羣臣皆諫止乃遣
明宗討之明宗至魏軍城西行欽軍城南而明宗軍變
入于魏與在禮合行欽聞之退屯衛州以明宗反聞莊
宗遣金槍指揮使李從璟馳詔明宗計事從璟明宗子
也行至衛州而明宗已反行欽乃繫從璟將殺之從璟
請還京師乃許之明宗自魏縣引兵南行欽率兵趨還
京師從莊宗幸汴州行至滎澤聞明宗已渡黎陽莊宗
復遣從璟通問于明宗行欽以爲不可因擊殺從璟明

宗入汴州莊宗至萬勝鎮不得進與行欽登道旁冢置酒相顧泣下有野人獻雉問其冢名野人曰愁臺也莊宗益不悅因罷酒去西至石橋置酒野次莊宗謂行欽曰卿等從我久富貴急難無不同也今茲危蹙而默默無言坐視成敗我至滎澤欲單騎渡河自求總管卿等各陳利害今日俾我至此卿等何如行欽泣而對曰臣本小人蒙陛下撫養位至將相危難之時不能報國雖死無以塞責因與諸將百餘人皆解簪斷髮置之于地誓以死報君臣相持慟哭莊宗還洛陽數日復幸汜水郭從謙反莊宗崩行欽出奔行至平陸爲野人所執送

虢州刺史石潭折其兩足載以檻車送京師明宗見之罵曰我兒何負于爾行欽瞋目直視曰先皇帝何負于爾乃斬于洛陽市市人皆爲之流涕五代史及貝州軍亂趙在禮入魏州莊宗方擇將皇后曰小事不勞大將促紹榮指揮可也乃以行欽爲鄆都行營招撫使領騎二千進討洎至鄆城攻之不能下退保于澶州未幾諸道之師稍集復進軍于鄆城之南及明宗爲帥領軍至鄆行欽來謁于軍中拜起之際誤呼萬歲者再明宗驚駭遏之方止既而明宗營于城西行欽營于城南三月入日夜明宗爲亂軍所迫唯行欽之軍不動按甲以自固明宗密令張虔鈞至行欽營戒之曰且堅壁勿動計會同殺亂軍莫錯疑悞行欽不聽將步騎萬人棄甲而退自知失策且保衛州因誣奏明宗曰鎮帥已入賊軍終不爲國使明宗旣劫出鄆城令人走馬上章申理其事言臣且于近郡聽進止莊宗覽奏釋然曰吾知紹榮妄矣因令白從訓與明宗子繼環至軍前欲令見明宗行欽繁繼環于路明宗凡奏軍機拘留不達故旬日之間音驛斷絕及莊

宗出成皋知明宗在黎陽復令繼璟渡河召明宗行欽
卽殺之仍勸班師四月一日莊宗旣崩行欽引皇后存
渥得七百騎出師子門將之河中就存霸沿路部下解
散從者數騎而已四日至平陸縣界爲百姓所擒縣令
裴進折其足檻車以獻明宗卽位

詔削行欽在身官爵斬于洛陽

嗚呼死之所以可貴者以其義不苟生爾故曰主在與
在主亡與亡者社稷之臣也方明宗之兵變于魏諸將
未知去就而行欽獨以反聞又殺其子從璟至于斷髮
自誓其誠節有足嘉矣及莊宗之崩不能自決而反逃
死以求生終于被縛而見殺其言雖不屈而死非其志
也烏足貴哉

安金全代北人也爲人驍果工騎射號能擒生踏伏事

晉爲騎將數從莊宗用兵有功官至刺史以疾居于太

原

五代史安金全代北人世爲邊將少驍果便騎射武皇時爲騎將屢從征討莊宗之救潞州及平河朔皆

有戰功累爲刺史以老病退居太原莊宗已下魏博與梁相距河上梁將

王檀襲太原晉兵皆從莊宗于河上太原無備監軍張

承業大恐率諸司工匠登城扞禦而外攻甚急金全彊

起謂承業曰太原晉之根本也一旦不守則大事去矣

老夫誠憊矣然尚能爲公破賊承業喜授以甲兵金全

被甲跨馬召率子弟及故將吏得百餘人夜出北門擊

檀于羊馬城中檀軍驚潰

五代史石君立趙州昭慶人也亦謂之石家財初事代州

刺史李克柔後隸李嗣昭爲牙校歷典諸軍夾城之役君立每出挑戰壞汴軍柵壘俘擒而還入年與汴軍戰

于龍化園敗之獲其大將卜渥以獻嗣昭每出征俾君立爲前鋒敵人畏之王檀之逼晉陽也城中無備安金全驅市人以登陴保聚不完時莊宗在魏博救應不暇人心危懼嗣昭遣君立率五百騎自上黨朝發暮至王檀游軍扼汾橋君立一戰敗之徑至城下馳突斬擊出入如神大呼曰昭義侍中大軍至矣是夜入城與安金全等分出諸門擊殺于外遲明梁軍敗走十七年將兵屯德勝時汴軍自滑州轉餉以給楊村砦莊宗親率騎軍于河外循岸而上邀擊之汴人拒楊村五十里于河曲播張村築壘以貯軍儲莊宗令諸軍攻之汴人設伏于要路逆戰僞敗王師乘之賊入壘門梁伏兵起因與血戰君立與鎮州大將王釗陷入賊壘時諸將部校陷賊者十餘人君立被執送于汴梁主素知其驍勇欲用之爲將械而下獄久之梁主遣人誘之君立曰敗軍之將難與議勇如欲將我我雖眞誠効命能信我乎人皆有君吾何忍反爲仇人哉旣而諸將被戮尚惜君立不之害同光元年莊宗至汴而晉救兵稍至然莊宗不以前一日梁主始令殺之而晉救兵稍至然莊宗不以金全爲能終其世不錄其功金全與明宗有舊明宗卽

位拜金全振武軍節度使同中書門下平章事在鎮二

年召還京師以疾卒

五代史天祐中汴將王檀率師三萬乘莊宗在鄆來襲并州時城無

備兵敵軍奄至監軍張承業大恐計無所出閱諸司

匠登陴禦捍外攻甚急金全遽出謂承業曰老夫退居

抱病不任軍事然吾王家屬在此王業本根之地如一

旦爲敵所有大事去矣請以庫甲見授爲公備寇承業

卽時授之金全被甲跨馬召率子弟及退閒諸將得數

百人夜出北門擊賊于羊馬城內梁人驚潰由是退却數

俄而石君立自潞州至汴軍退走微金全之奮命城幾

危矣莊宗性矜伐凡大將立功不時行賞故金全終莊

宗世名位不進明宗與之有舊及登極授金全同平章

事事充振武軍節度使在任二年治民爲政非所長詔赴

關俄而病卒廢視朝二日初南北對壘汴之游騎每出

必爲金全所獲故梁之偵邏者咸懼目之爲安五道

比鬼將有五道之名也子審琦等皆位至方鎮別有傳

又審通金全之猶子也幼事莊宗累有戰功轉先鋒

指揮使同光初爲北京右廂馬軍都指揮使屯奉化軍

四年春赴明宗急詔軍趨夷門爲前鋒天成初授單州

北刺史改齊州防禦使兼諸道先鋒馬軍都指揮使奉詔
征從房知溫營于蘆臺會龍旺部下兵亂審通脫身
授檢校太傅滄州節度使圍王都于中山躬冒矢石爲功
飛石所中而卒贈太尉又安審琦字國瑞其先沙陀
部人也祖山盛朔州牢城都校贈太傅父金全安北都
護振武軍節度使累贈太師唐書有傳審琦性驍果善
騎射幼以良家子事莊宗爲義直軍使遷本軍指揮使
天成初唐末帝由潞邸出鎮河中奏審琦爲牙兵都校
使及凱旋改龍武右廂都校領富州刺史清泰初爲捧
聖指揮使領順化軍節度使其年鎮邢州兼北面行營
未幾入爲歸化指揮使王師伐蜀充行營馬軍都指揮使
排陣使從張敬達圍太原及楊光遠舉晉安寨降于晉
祖審琦亦預焉晉祖踐阼加檢校太傅同平章事充天
平軍節度使兼侍衛馬步軍都指揮使旋以母喪起復
天福三年就加檢校太尉尋改晉昌軍節度使京兆尹
七年移鎮河中晉少帝嗣位加檢校太師開運末朝廷
以契丹入寇以審琦爲北面行營馬軍左右廂都指揮使
使與諸將會兵于洛州俄而敵騎大至時皇甫遇慕容
彥超亦預其行乃率所步兵與敵戰于安陽河上時遇

馬爲流矢所中，勢已危蹙。諸將相顧，莫有敢救者。審琦謂首將張從恩曰：「皇甫遇等未至，必爲敵騎所圍。若不急救，則爲擒矣。」從恩曰：「敵勢甚盛，無以枝梧。將軍獨往，何益？」審琦曰：「成敗在命也。若不濟與之俱死，假令失此二將，何面目以見天子？遂率鐵騎北渡，敵見塵起，謂救兵至。乃引去。遂救遇與彥超而還。晉少帝嘉之，加兼侍中。移領許州，未幾，移鎮兗海。漢有天下，授襄州節度使，兼中書令。屬荆人叛，命潛遣舟師數千屠襄郢。審琦禦之而遁。朝廷賞功，就加守太保。進封齊國公，歲餘又加守太傅。國初，封南陽王。顯德初，進封陳王。世宗嗣位，加守太尉。三年，拜章請覲優詔，許之。加守太師，增食邑至一万五百戶。食實封二千三百戶。審琦鎮襄沔，僅一紀，嚴而不殘，威而不暴。故南邦之民，甚懷其惠。五年，移平盧軍節度使，承詔赴鎮。因朝于京師。世宗以國之元老，禮遇甚厚。車駕親幸其第，以寵之。六年正月七日，夜爲其下人安友進安萬合所害。時年六十三。初，友進與審琦之愛妾私通，有年數矣。其妾常慮事泄，見誅。因與友進謀害審琦。友進甚有難色。其妾曰：「爾若不從我，當反告琦。」所抗劍與友進，友進猶惶駭不敢刺。及逮召其黨，安友進乃許之。至是夕，審琦沉醉寢于帳中。其妾乃竊審琦所抗劍與友進，友進猶惶駭不敢刺。及逮召其黨，安友進乃許之。至是夕，審琦沉醉寢于帳中。其妾乃竊

萬合便殺審琦既而慮事泄乃引其帳下數妓盡殺以滅其迹不數日友進等竟敗悉爲子守忠讐而戮之世宗聞之震悼輒視朝三日詔贈尚書令追封齊王守忠仕皇朝累爲郡守又安審暉字明遠審琦之兄也起家自長直軍使轉外衙左廂軍使從莊宗平幽薊戰山東定河南皆預其功同光中授蔚州刺史天成初改汝州防禦副使歷鳳翔徐州節度副使河東行軍司馬晉高祖龍飛以霸府上僚授鎮武兵馬畱後遷河陽節度使不踰月移鎮鄜州丁內艱起復視事五年李金全據安州叛詔馬全節爲都部署領兵討之以審暉爲副安陸平移鎮鄧州進位檢校太傅六年冬襄州安從進叛舉漢南之衆北攻南陽南陽素無城壁唯守衙城賊傅城下審暉登陴召賊帥以讓之從進不克而退襄州平就加檢校太尉少帝嗣位加檢校太師罷鎮授右羽林統軍歲餘出鎮上黨屬契丹內侵授邢州節度使居無何日疾暴作上章求代歸于京師養疾累年太祖卽位召于內殿從容顧問尤所歎重將以祿起之審暉辭以暮齒願就頤養拜太子太師致仕封魯國公累食邑五千戶寶封四百戶廣順二年春卒年六十三廢朝二日詔贈侍中謚曰靜子守麟仕皇朝爲贊善大夫五代

史補安審琦素惡釋氏凡居方鎮僧凡有過不計輕重殺之及鎮青州也一旦方大宴忽有紫衣僧持錫杖直至中門審琦仗劍逐之將及而滅但聞錫杖聲鏗然入在卧所審琦驚懼之際有小蒼報曰國夫人生子矣得非紫衣錫杖者乎因命之曰僧哥卽安守忠也自是審琦稍稍敬重

袁建豐不知其世家晉王討黃巢至華陰鬪得之時方九歲愛其俊爽收養之長習騎射爲鐵林都虞候從擊王行瑜李匡威以功遷突陣指揮使從莊宗破夾城戰柏鄉遷左廂馬軍指揮使明宗爲內衙指揮使建豐爲副使從莊宗入魏取衛磁洺三州拜洺州刺史擊梁將王千斬首千餘級獲其將校七十餘人遷相州刺史從

戰胡柳指揮使孟遷據相州叛建豐還討平之徙隰州
刺史病風廢明宗卽位以舊恩召還京師親幸其第撫

慰甚厚加檢校太尉遙領鎮南軍節度使俾食其俸以

卒贈太尉

五代史袁建豐武皇破巢時得于華陰年方九歲愛其精神奕俊俾收養之漸長列于左方

右復習騎射補鐵林都虞候從破邠州王行瑜以功遷

左親騎軍使轉突騎指揮使從莊宗解圍上黨破柏鄉

陣累功遷右僕射左廂馬軍指揮使明宗爲內衙指揮

使建豐爲副北討割守光常身先士伍轉都教練使權

蕃漢副總管莊宗入鄆以心腹幹能選爲魏府都巡檢

使從征劉鄩下衛磁洛有功加檢校司空授洺州刺史

于臨洺西敗梁將王遷數千人生獲將領七十餘人俄

拜相州刺史徵赴河上預戰于胡柳破建豐領相州軍

士行營在外委州事于小人失于撫馭指揮使孟守謙

據城以叛建豐引兵討平之改隰州刺史染風痺于任

明宗嗣位念及平昔副貳之舊詔赴洛下親幸其第撫

問隆厚加檢校太傅遙授鎮南節度使俾請俸自給後

三

卒于洛陽年五十六廢朝一日贈太子少師至諸衛大將軍

西方鄴定州滿城人也父再遇爲州軍校鄴居軍中以
勇力聞年二十南渡河遊梁不見用復歸莊宗于河上
莊宗以爲孝義指揮使數從征伐有功同光中爲曹州
刺史以州兵屯汴州明宗自魏反兵南渡河而莊宗東
幸汴州汴州節度使孔循懷二志使北門迎明宗西門
迎莊宗所以供帳委積如一日先至者入之鄴因責循
曰主上破梁而得公有不殺之恩奈何欲納總管而負
國循不答鄴度循不可爭而石敬瑭妻明宗女也時方
在汴鄴欲殺之以堅人心循知其謀取之藏其家鄴無

如之何而明宗已及汴乃將麾下兵五百騎西迎莊宗
見于汜水嗚咽泣下莊宗亦爲之噓唏乃使以兵爲先
鋒莊宗至汴西不得入還洛陽遇弑明宗入洛鄴請死
于馬前明宗嘉歎久之明年荆南高季興叛明宗遣襄
州節度使劉訓等招討而以東川董璋爲西南面招討
使乃拜鄆夔州刺史副璋以兵出三峽已而訓等無功
見黜諸將皆罷璋亦未嘗出兵惟鄆獨取三州乃以夔
州爲寧江軍拜鄆節度使已而又取歸州數敗季興之
兵鄆武人所爲多不中法度判官譚善達數以諫鄆鄆
怒遣人告善達受人金下獄善達素剛辭益不遜遂死

于獄中鄴病見善達爲崇卒于鎮滿城人也父再遇爲
州軍校鄴居軍中以勇力聞年二十南渡河遊梁不見
用復歸莊宗以爲孝義軍指揮使累從征伐有功同光
中爲曹州刺史命以州兵屯汴州明宗由魏州南渡河
時莊宗東幸汴州汴州節度使孔循隱懷二志使北門
迎明宗西門迎莊宗凡供帳委積悉如一日先至者入
之鄴因責循曰主上破梁室子公有不殺之恩奈何欲
納總管循不答鄴度循不可理爭以石敬瑭之妻明宗
女也時方在汴欲先殺之以堅人心循知其謀取之藏
其家鄴無如之何乃將麾下兵五百騎西迎莊宗見于
氾水嗚咽泣下莊宗亦爲之噓唏使以兵爲先鋒莊宗
還洛陽遇弑明宗入洛鄴請死于馬前明宗嘉歎久之
明年荆南高季興叛明宗遣襄州節度使劉訓等招討
而以東川董璋爲西南招討使乃拜鄴夔州刺史副璋
以兵出三峽已而訓等無功見黜諸將皆罷璋未嘗出
兵惟鄴獨取夔忠萬三州乃以夔州爲寧江軍拜鄴爲
節度使已而又取歸州數敗季興之兵鄴武人所爲多
不中法度判官譚善達數以諫鄴鄴怒遣人告善達受
人金下獄善達素剛辭益不遜遂死于獄中鄴病見善

達爲崇
卒于鎮

五代史記卷第二十五